

筆記小說大觀

集

明談孺木著
棗林雜俎

第三冊

進步書局校印

1875

1876

1877

1878

1879

棗林雜俎聖集目錄

科牘

貢額

癸未禮闈三改

爭狀元遣戍

南宮傳代蒙宥

庶吉士三選及貢士外官

焚闈

庶吉士一年散館

鼎甲館課

爭解元占席

試規

會試錄序

附學生

明經

庶吉士四選

庶吉士再選

習譯監生

庚辰齒錄

翰林院秀才

寬貢士三科

減場

齒錄聘二氏

鄉錄論表各二

三甲進士刊策

鼎甲並相

羅萬化

劉珠董又莘

館試斥落

冒籍

辨李廷機失中三元

省試專遣

楚試不用詞林

程策相同

割卷倖售

韓敬

劉暹

鄉榜填改

巡撫監試

鬻元

廷試策失塗注

會試特點同官

管紹寧

首輔鄉人狀元

二甲御書

廢卷騰聲

程策之誤

丁丑鼎甲

馮士驊

萬年歷

南闈謠

馮元颺

主考宴

進士歸娶

解元未娶

宗室進士

兄弟同進士榜異姓

進士同姓名

武生進士

進士異任

重舉鄉榜

優免廩生

莆田科甲之盛

原始

臚傳

試錄稱臣

六預鄉房

三氏學

學宮祀顏子

廣文變例

補榜

進士

先正流聞

宋濂攻苦

周壽誼人瑞

唐伯逸

鄒傑復姓

賈魯斥佛

遂宏言事

周魯章蓑笠

蔡新童婢

徐樞

于謙

李秉蒙迎駕詩蒙原作夢

尹恂

楊瑄

王恕

王存忠

楊守陳故宅

楊循吉定論

包德懷嫁友女

周廷芳

周鑑

陳恪冰清玉潔

邵寶絕巫

吳翰詞

潘塤

蔣信

劉大夏格言

李東陽侑歌

陳察御史騎驢

魏庠廳旁塚

王勳赫鬼缺

清吏張守約

朱良育不受封

林了翁言行

熊鳳文不踞選司

桑桂移風社

韓昌

毛中丞里居

景暘孝感

胡松抄書

鄭慶祛蝗

王勅雲母

徐階論士

林思承致士

唐樞

唐順之

高拱知人

張居正急才

徐階李春芳陸樹聲

姚弘謨迎母

袁洪愈貧宦

余有丁家祭

沈思孝在戍

戚繼光

馮少墟規鄒南阜

申時行李廷機薄殯

李廷機鳩工

趙大華

李騰芳

張臣感慟

王汝訓散貲

唐文獻

陳滄孝紋

顧憲成寡欲

衛一鳳辟狐

鄭繼之

彭應參

詹景鳳

許弘綱責子

葉向高講學

吳道南

竇子偁

徐光啟

楊瀚

馮氏義僕

葛寅亮督學

丁賓老不忘孔林

朱國禎秀才氣

沈演四友二考

董其昌

錢士升

陳組綬結客

陸夢龍

張燁芳

吳麟徵家訓

柯起鳳不負丞

王朝堂死孝

藝寶

諭幼儒勅

宣尼遺筆

顏子

海鹽秦駐山始皇碑

偽書

嵇康真蹟

王大令洛神賦

雲麾將軍碑

百家姓

蘇子瞻制義

大學本義稿

朱文公集

心史鐵函

宋濂

道餘錄

御史試荳芽菜賦

周叙修宋史

蒲陽拘史

張元楨

詩韻辨

張東海自題像

司空圖

楊守陳

李夢陽論文

李夢陽何景明

江河伏流

常倫逸詩

王璜雲中歌

胡瓚

徐霖

前李攀龍

兩京賦

兩皇明通紀

張邦奇

修志

王道書壁雜帖

王慎中

國朝人物編

夏惟訥

唐覲

李于鱗王元美手抄

李于鱗閱史記

王元美讀書後毀論

余翔

穆熙焚書

謝陞季漢書

春雪詩

無名氏詩

明雋

宋登春

北雍刊史

陳于陞修史

西泠社

孫冕

爭詩

喻應益

王穉登

馮元成論文

周玄暉

陳植之

中秘書

收書法

纂書

厄書

文替

鍾惺譚元春

洪範明義

蔣德景日記

爭妾詩

山城曲

永和宮詞

思陵長公主挽詩

盧岐疑


王九思謝榛袁宗道

失婢詩

廣孝錄

續哀江南賦

補豔骨行



明 鹽官談遷孺木著

科牘

貢額

洪武三年。庚戌五月。始詔行科舉。直隸貢百人。河南山東山西陝西北平福建江西
浙江湖廣各貢四十人。廣東廣西各二十五人。若人才多寡不拘額。時直隸就試者
百三十二人。拔七十二人。見考官宋濂鄉闈紀錄。序鄉試錄曰。小錄。河南通志。是年
鄉榜。孫卓劉中趙斗南黃敬張堂王誼。辛亥鄉榜。張唯王輝李端張紳。

庚戌辛亥壬子癸丑。連歲開科。有未及會試。遂錄用者。

金華府志

也。洪武四年。吳伯宗榜。六年。金鑄榜。十八年。丁顯榜。紹興府志。按六年不開榜。存疑可

也。洪武五年。鄉舉。六年。是科狀元莫考。一云未嘗殿試。徑照會試名次選授。方徵王寅

方毅俱進士。

興化府志

洪武十七年。甲子。三月。詔貢士不拘額。從實充貢。

十八年。乙丑科會元黃子澄。狀元丁顯。

衡州府志。鄧偉奇。才。安仁人。乙丑會試第一。上親製廷試策問。以丁顯第一。偉奇

次之。俱授翰林修撰。偉奇天姿秀異。博洽穎敏。善屬文。尤長於詩。第二甲。為編

修。吳文為檢討。三甲楊靖為庶吉士。蹇瑤為中書舍人。或以練安黃子澄為是科。恐

未深攷云。

洪熙元年。乙巳。定南京八十人。北京江西五十人。浙江福建四十五人。湖廣廣東四

十人。河南四川三十五人。陝西山東三十人。廣西二十人。雲南交趾十人。貴州附湖

廣。永樂九年辛卯雲南始開科時貴州未附

宣德四年。己酉。雲南貴州始合試。增雲南五人。共十一人。貴州普安劉瑄。

宣德七年。壬子。雲貴共十五人。雲南十人。貴州五人。

正統二年。丁巳。令貢士不拘額。

正統五年。庚申。定順天仍八十人。應天百人。浙江福建六十人。江西六十五人。湖南

廣東五十人。湖廣五十五人。山東四十人。廣西三十人。雲南增三人。貴州增二人。共

二十人。

正統六年辛酉。增順天二十人。

正統十二年丁卯。增雲南二人。貴州三人。共二十五人。

景泰元年庚午。詔貢士不拘額。四年亦然。

景泰七年丙子。兩京各增三十五人。浙江江西福建河南湖廣山東各增三十人。廣

東四川陝西山西廣西各增二十五人。定雲貴三十人。雲南二十人。貴州二十人。

成化四年戊子。增雲南四人。貴州六人。共四十四人。

成化十年甲午。增雲南五人。共四十五人。

弘治七年。增雲南二人。貴州三人。明年乙卯。解額共五十人。

正德五年庚午。增雲南三人。貴州二人。共五十五人。

嘉靖十四年分。定雲南舉四十人。貴州二十五人。烏撒衛蒲仲良第一。

嘉靖十九年庚子。增湖廣五人。

嘉靖二十五年丙午。增貴州五人。

隆慶五年辛未。增兩京各十五人。

萬曆元年癸酉。增雲南五人。

萬曆二十二年。甲午。暫增順天二十人。時選貢生。增貴州共三十五人。

萬曆四十年。壬子。增順天十人。應天八人。

萬曆四十三年。乙卯。增兩京五人。浙江七人。江西湖廣福建河南山東山西陝西廣

西四川雲南貴州各五人。

天啟元年。辛酉。暫增順天二十人。應天十人。餘省各二人。是科山西宗生一人。江西

河南陝西宗生一人。山東四氏。學二人。遼生一人。不在正額。

崇禎下原缺四行。

明經

洪武九年。貢諸生二十五歲以上。

洪武十年。貢二十歲以上。

洪武十四年。貢諸生容貌端方者。

洪武十七年。貢歲貢年深成效者。禮部試中式入太學需用。

洪武二十一年。限府歲貢。縣三年一考貢。

洪武二十五年。府歲貢二人。縣歲貢一人。

永樂十二年。貢楷書諸生。

宣德八年。貢諸生四十五歲以上。

正統十二年。貢諸生四十歲以上。

天順七年。貢四十五歲諸生者。

嘉靖十年。令天下歲貢五人。選其一。歲貢。通學考選至十五年止。

嘉靖十一年。令郡縣各開貢。二年仍考選。下原缺
三行

天啟元年。鄉試乙榜廩生准貢。

崇禎元年。登極恩貢。

乙亥。通考各學廩生。拔貢一人。

己卯。鄉試乙榜俱充貢。不論增附。

甲申。各學恩貢一人。

弘光元年。命鄉試恩貢副榜。各輸餉百五十金。准貢。

癸未。禮闈三改。

永樂癸未。以靖難渡江。會試改八月。天順癸未。貢院災。改八月。明年廷試。崇禎癸未。

以邊惠改八月會試九月廷試

庶吉士四選

永樂二年三月己酉選庶吉士楊相宋子環王訓王直秦政學徐安吾紳彭汝器周忱劉子欽周文李甯張徹章朴歐陽俊盧翰梁任熊直王道曹景暉陸孟良蕭省身劉孟鐸柴廣敬張宗璉田忠曾與賢洪鍾洪順余學夔陳滿蕭清劉紹林鳳張憲殷昂嚴光祖涂順段民李貞江鉞章敞倪維哲許塔陳敬宗王仲壽李迪袁添祿李時勉楊榮並習文湯流王英孫奉余鼎李永年袁邇周遠鍾旭彭禮戴弘演並習書戶部辦事進士當塗李衡以年少自請命改庶吉士同江甯習書

四月甲申進士沈升孫子良李昌祺羅汝敬徐敬蕭寬褚讓獨孤樂善陳士啟陳綱董鏞劉子敬陳伯恭陳資善趙曾趙濟劉剛尤儀劉澄黃揚俱改庶吉士修書

五月辛丑朔諸司辦事進士能書者曾慎魏騏吳惇漆霄趙理趙琰韓庸史彬徐觀樊靜曹彥昌陳旭田墳羅處富邢旭曾怒王宅葉貞陳興俞禮趙澹恭潘中徐昉胡秉彛周志義俞益曹睦楊儀鳳譚原性為庶吉士

六月命修書庶吉士獨孤樂善陳士啟蕭寬李昌祺羅汝敬沈升孫子良褚讓吳惇

魏騏陳旭韓庸葉貞趙理徐聆留院辦事餘三十四人取選尚遠歸原籍

舊京詞林記

爭狀元遣戍

永樂四年丙戌莆田林環進士第一同邑庶吉士陳實自負其才疏取狀元不公上詔召詰之對曰臣百問百答遂命學士解縉撰百問策一道縉擬以聖門七十二賢賢賢何德雲臺二十八將將將何功為問及記里鼓論上臨軒命林環陳實對試實對曰聖人之育才與王者之報功事雖殊而道則一也請試陳之昔孔子當春秋之否轍環不通乃欲以轉否之責博望諸徒故杏壇設科時有七十二賢焉漢明帝承光武之統國家閒暇乃欲以救功之典激厲羣雄故雲臺紀績時則有二十八將焉收桃李於門牆列名姓於廊廟天下後世稱君道師道之極者有以夫今以七十二賢之德言之顏閔冉耕雍子子貢與夫冉有季路言偃商師其德之載諸孔論者無待陳矣自此之外去捷徑而私謁是戒持狷介而百結是甘有滅明原憲矣然遇事而不更其守貧賤而不移其心不有商瞿顏襄曹卹顏高者乎親賢以造君子願學而為小相有子賤子華矣然脫庸俗以游高明習禮樂以養性情不有梁鱣漆雕哆商澤冉孺伯虔者乎南宮适之所尚在德漆雕開之見道分明固不可及其他

公孫龍后處。或學君子。或務自修。環駟赤樂。效孔忠。或道中庸。或明家學。其有得於聖教。何如哉。公治長之非罪。冉子季之四長。固為可稱。其他漆雕徒父。鄭單榮旂。或以操著。或以才名。公哲哀良。孺原亢籍。步叔乘。或敬治已。或惠及人。其為聖門之傑。出何如哉。究孝弟以體悉聖心。遭患難而寵辱一致。石作蜀。有若巫馬。期句井疆。縣成其人也。志不降而行不淪俗。畧細節而守不詭隨。申振罕。父黑。宰左之郢。其人也。更寒暑而學不厭。隨窮達而守如常。孰若公夏首狄黑。秦商顏之僕。燕伋秦非。馬仁孝修而貌如愚。麤鄙變而志仁道。孰若高柴。公堅定。鄭國樊須。馬。避叛兄而能潔。遵善誘而德馨。司馬耕與顏子柳耳。至於句茲容箴。公西箴施之常。其所以聯同姓而明臣道。謂非斯人之徒與。道可明而志不屈。問詩禮喜得三。公與陳子禽耳。至於顏噲廉潔。任不齊。叔仲會邾莒。其所以履中正而挺高尚。謂非斯人之匹與。噫。此聖教之所甄陶。而為天下萬世之所崇祀者也。復以二十八將之功言之。滅羣雄。除苛政。與夫斬將奪旗。攻城畧地者。固不乏人。而其功之尤為特異者。果為誰哉。首建大策。以光武為必可為。鄧禹壯矣。然鎮守河內。使民生不苦於兵戈。不有寇恂乎。八戰八克。以敵國為不足謀。吳漢勇矣。然安集關中。致百姓相安於無事。不有馮異乎。

折衝千里。彎弓三百。自古惟勇將能之。而賈復蓋延匹美矣。憂國奉公。善待士卒。自古惟仁將能之。而蔡遵王霸克追焉。耿弇決策定計。而以勝算高天下。固兵家之雄也。而耿純陳俊。料敵如神。每出而成克捷之勳。非中興良佐乎。任光羽翼太平。而以威望先士卒。固當世之英也。而邳彤萬修。運竒掌上。逐鹿而樹萬全之功。非佐命巨擘乎。王梁杜茂。應赤符而擊五校矣。乃撫劍抵掌。志驅伊吾之北者。臧公馬武也。岑彭姚期。平西蜀而斬王郎矣。乃善治鄣塞。身負矢石之難者。馬成堅鐔也。景丹傅俊。李忠。或收戰勝之烈。或參幃幄之謀。為功不同。而其策立於當時者。要皆從王事於有終者也。朱祐劉隆劉植。或稱汗馬之勞。或展運籌之功。所建不同。而其効力於王國者。要皆為社稷之翼衛者也。然論者謂七十二賢中。有秦冉顏何冉黨。夫三人者。將以為是。則德業聞望。寂然無聞。何與。意者世殊時異。傳記有所差訛。故若存若亡。如此耳。又謂二十八將外。有王常李通竇融卓茂。夫四人者。將以為非。則並畫於臺一體。崇祀何與。意者功非草創。績在方來。故推恩至此耳。要之賢人君子。何代無之。而名世之出。每待王者。觀聖賢者。慎毋以七十二賢為絕德。當如宋邵楊程朱諸公。庶無負聖教。而得與夫崇祀之列。觀雲臺者。慎毋以二十八將為竒功。當如國朝徐

常沐郭諸公庶感動。帝衷而得與乎畫圖之選者哉。策上。林環亦條答詳悉。竟以廷爭違旨。永戍邊衛。實赴衛。亡何卒。二子繼沒。時勾補到衛。輒死。累及旁支。嘉靖

間始開免。

福州府志

又實諸生時。上官謁文廟。屬實贊禮。值大雨。擬拜階上。實高唱曰。拜下。禮也。上官勉下拜。已升明倫堂。命講大誥以難之。實曰。此朝章。當立聽。上官竟不得坐。

庶吉士再選

永樂四年三月癸丑。選進士為庶吉士。江殷。胡啟先。孫迪。張叔豫。李岳潤。陳孟潔。張文選。鄭復言。曾春齡。曹聞。盧永。黃獻。及修書貢士朱紳。復選進士黃安。王資益。黃信功。黃所載。鄭回。趙圭。陳夢京。羅仲深。邵輝。吳文。徐廷圭。鄧成。周煒。陳實。謝霖。楊復王淪。樂時逢。劉本黎。為庶吉士。

南宮傳代蒙宥

永樂十年二月庚午。會試未場。貢士張彥。晒余彞。互傳代策。御史送禮部。請鞠治。皇太子令翰林官閱其文。平常。宥之。復監竣後科。

習譯監生

永樂□□譯字監生許應舉。會試卷未。仍譯書數十字。場畢。送翰林院定去。取仍送入場填榜。天順□□以奔競革。

庶吉士三選及貢士外官

宣德八年三月戊辰選進士尹昌黃瓚趙陳睿傅綱黃回祖又乙榜貢士龍文章瑾李滄梁蔡黃平陳詔田鈞李蒲王鑑朱奎袁和林同柴同恩張承翰陳康龔理相左黃輿李奈王佐鄭觀胡如暘趙象蔣榮祖命改進士為庶吉士乙亥賜詩。

十一月甲辰尚書蹇義楊士奇楊榮郭璉胡濙選前科進士能文者徐程賴世隆吳節李紹萬洪虞瑛潘洪王玉陳金劉實鄭建方熙何宣為庶吉士學士王直教習。

己酉諭行在吏部尚書郭璉選外官文學者明日奉引六十八人命楊士奇楊榮試之□□知縣孔友諒進士胡端楨廖莊宋璉教諭黃純徐維超訓導婁升改進士為庶吉士。

庚辰齒錄

天順四年齒錄閣臣許彬子起刻兄越奎文閣典籍。

進士仁和汪諧齒錄書父仲淵蓋極刑諱其名也。

災聞

天順癸未禮闈火。貢士焚死百□十□人。並賜進士。諭祭。吉水羅狀元倫。常熟徐侍郎怡。俱若有人提出之者。餘杭葉御史綱。夢神告以束緋而入。及濱危。吏卒謂緋者。官紳也。果救免。

翰林院秀才

成化丙戌科榜眼休甯程敏政

丁未科進士眉州歐鈺。

庶吉士一年散館

成化辛丑科。庶吉士。明年壬寅八月辛丑。李東陽。倪岳。謝鐸。焦芳。陳音。授編修。吳布。賢。授檢討。劉瀉。改中書舍人。張敷華等九人。俱主事。

寬貢士三科

弘治二年乙酉。九月乙卯。貢士林潤。以會試三黜。故事。禁入試。請寬。明年特許一科。三年庚戌十二月甲戌。弛貢士三科不試之禁。

鼎甲館課

弘治壬戌科選庶吉士。併修撰。康海編修。孫清。李廷相。俱課書。命學士梁儲。王華。教習。先是天順四年三月丙戌。選庶吉士劉健等十五人。並修撰王一夔。編修李永通。鄭環。命學士劉定之。侍讀學士錢溥。教習。先後鼎甲不課。萬歷壬辰後。選館概課。甲不出。

減場

正德甲子科。四川解元周洪謨。

丁卯科。福建解元陳俊。初場俱五義。

爭解元占席

正德庚午科。山西解額陳皋謨第一。沁水常倫次之。方鹿鳴。宴倫。歷階而升。請與皋謨角。主司慰諭。占席乃退。明年辛未。倫成進士。授大理寺評事。以酣狂謫壽州判官。仍故態。扶於臺使。棄官後。服除。起甯羗州守。不赴。已謁選。騎出歸德。舞雙刀。陷淖中。伏刃死。年三十三。亡子。倫醉即矢口成詞。邑妓孔留。性敏。記立被之絃索。隻字不遺。今澤潞間。所傳樓居子樂府。得之孔留。

齒錄聘二氏

正德戊辰秋。探花莆田戴大賓。寅仲。原聘高氏。太監劉瑾強以兄女字之。齒錄刊聘高氏。劉氏大賓奔母喪。道卒。劉氏嫁關中士人。坐瑾黨削籍。

試規

宋制。大比之歲。每州皆有貢院。本州士子皆得入試。明朝先以監司選擇之。乃以入試。景泰以後。專委之提學憲臣。

嘉靖初。會場禮部條約。許舉子帶洪武正韻一部。表末時不用瞻天仰聖。見董穀碧里雜存。

科場舊規。正考閱易書二經。副考閱詩春秋禮三經。各不相涉。見詞林典故。

鄉錄論表各二

嘉靖七年。戊子科。江西主試。□□□□羅□□刑部主事。屠應埏鄉試錄。刊論表各二篇。名雖舉子。仍分注羅撰屠撰。

會試錄序不受門生

嘉靖己丑科。會試錄後序。羅韜撰。畧曰。我百執事。知所以事君乎。賢才。社稷之隸也。聖主求才。為社稷也。吾臣子貪以為功。得罪社稷。孰大焉。是故多士進矣。聖天子

不用為私用。我百執事。其敢曰士繇我進為吾門生。市私恩乎。又曰爾多士進矣。服事庶僚。鞠躬誓心。下衛民生。上衛社稷。圖報聖天子為帝臣公臣。毋德舉。玉偃曲阿比以獲戾。社稷是爾社稷之臣也。其慎諸。於戲。其慎諸。

正德甲戌科。霍韜會元。於座主不稱門生。

萬曆乙未科。吏科都給事中。□□楊東明。分考不受門生。

三甲進士刊策

嘉靖乙未科進士。安陽郭樸。第三甲出身。上善其策。命鐫於一甲後。

附學生

甯國府志。嘉靖十五年。知府李默著。載附學生郡百人。宣城八十人。南陵涇太平各七十人。甯國三十人。旌德四十人。又泗州志。嘉靖初。侯定訓著。盱眙附學生僅三十人。乃募子弟可百人。教之。明年夏補諸生三十五人。餘督教如舊。以兩地觀之。往時附學生猶寥寥也。

鼎甲並相

嘉靖壬戌科。一甲申時行。王錫爵。余有丁。

萬歷丁未科。一甲黃士俊。張瑞圖。施鳳來。

丙辰科。一甲錢士升。林鈺。賀逢聖。以上俱入相。士戍固極盛。而丁未諸公頗有遺議。士升。丁酉歲選太學。文不售。考選例當縣丞而止。乙卯舉北雍。聯捷躋於政府。

羅萬化

廷試策進呈必書法潔整。隆慶戊辰科。閣臣進呈。上疑首卷有私。於二甲卷。手得羅萬化寘第一。其卷書法多塗抹。

劉珠董又莘

公安劉珠惟明。嘉靖丁酉貢士。困公車三十六年。每下第。輒投執友江陵張太岳詩。始知相府深如海。不使山人醉似泥。又相府勛名青鬢少。故人心事白頭多。隆慶辛未科。年六十六。成進士。珠上太岳書。欲知座主山為壽。先看門生雪滿頭。

萬歷乙丑科。睢州董又莘。時年七十。歷南京大理寺卿。年殆九十。視履無恙。

館試斥落

正德十二年。丁丑。進士睢州劉淮。考館。試卷風吹過五鳳樓南御河邊。尋得楊閣老。將卷面批不謹二大字。遂不取。

令甲嚴科場冒籍。按宋科場嘗二年一開。或四年。三年一開。天下舉人多就開封府寄應。徐節孝先生曰。二年一開。不若使各路轉運司類試。總一路解額。解額既廣。則人皆便之。是可以草寄應之弊也。

辨李廷機失中三元

李九我。隆慶解元。主考瑤泉申少師。即留為館賓。轉館於歸安董宗伯家。癸未李得會元。申正當國。宜以狀元予之。續商文毅之盛。乃拔朱養淳國祚第一。李君居二。有意乎。無意乎。二公皆清正。未可甲乙也。朱國楨湧。慳小品。按癸未廷試。申文定以子用懋入試。避讀卷。則文肅所著。殆未之考也。九我賜第後。見秀水頗怏怏。一日秀水疾。九我過候。坐榻推窗。庭松蟠屈。笑曰。弟嘗夢歷此景。或云功名在是。今得之矣。名次凡後。非豫兆耶。自是懼洽無聞。

省試專遣

萬歷乙酉。始遣京官主試各省。舊主副俱教職。由監試御史所聘。藩司提調。臬司監臨。彌封謄錄受卷官。皆有司。例得閱墨卷。有所識拔。簾內毋敢違也。自朝臣專遣內

廉始肅又□□□巡按御史邵梅墩□□監試江西令內外簾並用硃卷。

楚試不用詞林

萬歷甲午科。禮部推湖廣主試翰林院□□□□□吏部左給事中葉繼美。上除翰林竟點繼美。另用工部主事莊懋華。

程策相同

萬歷丁酉科。洗馬鄒德溥擬南京主考。其寓邸乃霍文炳故居。窖金若干坎之為巡城御史。况上進所劾。免官。因以所撰策一道。貽南京河南主考。俱故人也。竟以雷同。被給事中劉道亨糾之。南京主考左庶子朱國祚。右中允葉向高。河南主考尚寶司卿蔣春芳。戶部主事李長庚。

割卷倖售

萬歷丙午科。山陰監生鄭汝鏞舉順天第四人。本僂游選。貢馬顯忠卷。割牘倖售。事覺。監試御史李楠。順天府丞題請顯忠補額。禮部謂無例。且末策非其策而止。

韓敬

歸安韓敬嘗師事宣城湯太史賓尹。萬歷庚戌。湯分考。搜鄰房。拔敬會元。時方忌湯。

遂見攻者眾。故免官。終身不達。彼其才自足。博一第。惜以主司累也。

劉暹

庚戌分考。諭德趙師聖得會稽。劉暹卷薦第一。主司嫌首義過奇。抑寘第六。趙固執不可。遂冠乙榜。謂來科必元。暹終不第。言及輒墮涕。

萬歷癸卯。江浦趙體敬丙午長洲陳元素俱擬鄉解不果。

鄉榜填改

萬歷壬子科。四川第六名。王應熊。悞填周繼昌。放榜後。□□推官楊一鵬。檢舉御史彭端吾以聞。有旨改正。繼昌走訴京不許。主試兵部員外郎張應徵。大理寺評事陳曰庭各罰俸二月。先是戊子八月。南場分考。當塗知縣德清章嘉楨填榜。四十九名。詩經荒字十號。□□悞填春秋荒字十號。曹祖正榜出。尋檢舉。應天府尹張楨等遂未進試錄。奏上。祖正除名。嘉楨奪俸。五月。詩經卷解部覆閱。

巡撫監試

鄉場監試例。巡按御史。或偶闕如。吾浙則改巡鹽御史。萬歷乙卯。貴州巡撫都察院右僉都御史張鶴鳴代監試。

會元

萬歷丙辰會元吳江沈同和係情筆首義又湯賓尹舊刻也放榜日一蒼頭喜甚即曰吾家中一會元又多一會魁同邑觀榜者即拉問爾一家安得兩拔乎即詰責被掠微吐其情亡何事敗並革第六名趙鳴陽長安以骰子戲曰斷么絕六。

廷試策失塗註

萬歷己未科會元莊際昌廷試策偶悞筆以塗註不便進呈例任之果第一其後論者謂膠勞不辨之狀元遂回籍讀書蓋忌方相國從哲借許之也崇禎辛未狀元陳于泰策陽陽悞易易榜眼吳偉業策唐之曠騎曠悞驥上俱手改丁丑會元吳貞啟對策亦悞筆同年包爾庚戲之曰兄又不辨字狀元矣。

會試特點同官

天啟壬戌科閣臣推何宗彥顧秉謙主禮闈上點宗彥忽及朱國祚非推也顧以是不懌疑秀水有他故後秀水捐館擬諡文懿朱公子爭之得諡文恪。

管紹甯

崇禎戊辰狀元閣擬武進莊應會 上閱卷不懌遞拔其次抽餘卷得管紹甯策內

誠字欠一。上問閣臣云何對曰聖意果可點畫何礙。上遂加一。真第三。紹甯因號誠齋。

首輔鄉人狀元

辛未狀元宜興陳于泰。為首輔周延儒表弟。故事會元策另封。有二錦衣官問知太倉吳偉業也。另封矣。閣擬于泰。偉及夏曰瑚。第一甲。上如之。御前拆封。首輔高聲曰。第一甲第一名。陳于泰。常州府宜興縣人。不覺汗出浹背。幸上不問。偉業謁周。周曰。以吾當國。而拔宜興人狀元。天下其謂我何。又語于泰曰。事有不辦而自明。有辨之而後明。今吾弟首臚。雖辨之誰為明我者。先是周買陳氏宗人宅。毀其家廟。陳氏攻之。實非有私也。于泰倨誕。亦不執師弟禮。

二甲御書

甲戌二甲第一名李昌系。上硃筆。蓋鼎甲御書。餘閣臣定之。時首擬武進陳組。纔宜興吳國華次之。上不憚。嘉善錢相國搜卷。得杞縣劉理順條對詳贍。但多訛字。上手訂焉。拔第一。

廢卷騰聲

崇禎丙子南場分考尹明興聞廢卷麓中有聲即檢閱仍不錄其聲加沸再檢再廢麓聲如初忽卷躍麓外尹異而拔之則無錫高世泰也見世泰問其何德世泰無對同年包爾庚問之曰向不二色

程策之悞

崇禎丁丑會試程策有云世宗之時外有大師俺答之內有鄧茂七劉六劉七之寇夫大師在成化時鄧茂七在正統末劉在正德中誤甚

丁丑鼎甲

崇禎丁丑廷試閣擬海甯陳之遴無錫高世泰廣昌劉大年前列常熟趙士春吉水劉同升則二甲及讀之遴卷上不一語讀大年卷色忤讀同升卷云陛下何負於諸臣哉諸臣負陛下耳上善之拔第一次之遴士春一甲首世泰

馮士驊

吳縣馮士驊善春秋屢困場屋貢禮部宜選司理崇禎乙亥或勸之應北闈果豫荐丁丑有孝廉來候知其馮姓曰足下今年必第矣叩之曰吾三年前寓此舍夢有人推我去云此馮進士寓所也足下適合之矣果成進士

萬年歷

崇禎庚辰科。上嘗閱萬年歷。相傳姜太公著。唐李涪風注。每朝各四句。本朝未

句。□□□□。魏蘇困。注魏氏蘇其困也廷試後。召對諸貢士。通州魏藻德敷奏稱旨。拔第一。

尋超拜相。藻德初名嘗有鬼自後呼之曰藻德因改名

南闈謠

崇禎壬午應天榜。宦室七十餘人。謠曰。不要古文。不要時文。只要松文。不用孔子。不用孟子。但用公子。是年相傳此榜後。不復試士。果然。

馮元鵬

癸未進士。慈谿馮元鵬。被召對。上曰。天津巡撫於爾何人。曰。胞兄也。又問五經中

者爾何人。曰。臣胞弟。

主考宴

兩京主考。惟順天主考。賜宴本府。會試主考。賜宴禮部。

進士歸娶

洪武十八年。乙丑科。探花仁和花綸。

永樂己丑科榜眼定遠苗衷年十九

永樂乙未科探花閩縣陳景著年十八

正統乙丑科吳縣劉昌長甯周洪謨

正統戊辰科榜眼長洲陳鑑年三十四平越黃紱懷安謝琚博野劉吉襄陵邢讓俱年長

景泰辛未科繁昌吳探年二十七

成化丁未科狀元鉛山費宏年二十一

弘治壬戌科海甯許元奎年三十一信陽何景明年十九

弘治乙丑科榜眼會稽董玘年十九

正德戊辰科探花莆田戴大賓年二十一丹徒唐鵬信陽戴冠弘農王言

正德丁丑科探花南海倫以訓年二十一

嘉靖癸未科探花華亭徐階年二十一涇陽秦世顯錢塘孫繼魯

嘉靖丙戌科會元趙時春年二十一

嘉靖己丑科荆門羅博晉江蔡克廉梁懷仁歙縣程尚甯鄞縣陳東

嘉靖乙未科晉江周天佐渭南薛騰蛟浦城周鳳岐

嘉靖戊戌科。南海馬拯。盧夢陽。興化陳應魁。莆田林茂植。豐城杜拯。濟南張潛。餘干李春芳。

嘉靖癸未科。曲周楊一鶚。峨眉苟延庚。龍游陸瓚。

隆慶辛未科。慈谿孫成名。錢若廣。高平劉虞夔。

萬歷丁丑科。平湖陳泰來。

萬歷庚辰科。南靖吳宗熹。番禺謝興思。

萬歷癸未科。永春李開藻。

萬歷己丑科。定襄傅新德。晉江林欲棟。同安蔡復一。漳浦吳霖。

萬歷乙未科。羅山劉尚朴。江陵朱光祚。臨晉荆養喬。

萬歷戊戌科。成安王家瑞。晉江林喬相。進士歸娶。容攷某科。

萬歷辛丑科。象山史起龍。

萬歷甲辰科。南海李待問。

萬歷庚戌科。昆明傅宗龍。東陽趙明欽。

萬歷癸丑科。狀元宜興周延儒。

萬曆丙辰科。德清蔡奕琛。

萬曆己未科。武昌彭祖壽。

崇禎戊辰科。宛平金鉉。

崇禎辛未科。榜眼太倉吳偉業。

解元未娶

吉水解縉。年十七

淳安商輅。年二十

吳縣劉昌。年十九

長甯周洪謨。年二十六

全州蔣冕。年十五

慶陽李夢陽。年十八

南海馬拯。年十七

銅陵余毅中。年十七

定襄傅新德。年十七

浙川全燧。年十九

宗室進士

宗室鄉舉。始天啟辛酉科。

宗室進士。始天啟壬戌科。

朱慎荃。

崇禎戊辰科。新建朱統飾。列輔國中計。選翰林庶吉士。改中書舍人。給假三年。奏復館員。

歷國子祭酒。

甲戌科新建朱統錚。初名寶符侯。輔國中尉。

華陽朱奉錚。初名錚。皆庶宗。未請名。至是改登玉牒。奉錚侯奉。國中尉。

丁丑科新建朱統鑣。輔國中尉。

澤州朱充鰲。輔國中尉。

庚辰科祥符朱朝壘。

癸未科南昌朱議汴。原封輔國中尉。

南昌朱統鎬。

稷山朱鼎婆。

陽城朱廷堦。

兄弟同進士榜異姓。

萬歷丁未科進士江甯徐鳳彩。余大成同胞兄弟。大成出繼外祖余氏。

進士同姓名。

永樂乙未科兩葉恕。

宣德庚戌科兩王復。

正統丙辰科兩李春葉景壽。

正統戊辰科兩張瑄。

正統辛未科兩楊瑄劉璋。

天順丁丑科兩王道。

成化丙戌科兩徐森。

成化己丑科兩鄭宏。

成化壬辰科兩洪漢。

成化甲辰科兩王溥。

弘治癸丑科兩曹瓊。

弘治丙辰科兩王言。

弘治壬戌科兩魯鐸。

正德辛未科兩王璽。

正德辛巳科兩王朝用。

正德丁丑科三張淮。

嘉靖丙戌科兩張守約。

嘉靖壬辰科兩高節。

嘉靖戊戌科兩章煥。

嘉靖辛丑科兩陳善。

嘉靖乙丑科兩陳王道王三錫李學詩。

萬歷丁丑科兩楊起元。

萬歷甲辰科兩張銓一大名人永樂□□司參政一沁水人以御史殉遼俱乙亥正

□月二十八日生科第子女皆同一奇也參政前守兗州有登岱詩後姜士望使君

□重沁水勒詩於石不知其悞下原缺一行

崇禎丁丑科兩陸自巖。

崇禎癸未科兩王曰俞。

武生進士

工部尚書劉麟廣西按察副使楊成俱武生第進士。

進士異任 附鄉舉

松陽王景科進士。□□程宗官翰林編修。□□成縉官□□□□□□□□俱闈為

內侍。

成化壬辰科進士。□□黃謙官工部主事。削籍。善醫。後為太醫院判。

成化辛丑科進士江甯梅純。以定遠知縣免歸。改襲孝陵衛指揮使。歷中都副留守。隆慶辛未科進士宋儒。以貴州土官子。冒籍定州。選庶吉士。改禮部主事。坐免襲麻

哈州土同知。

天啟乙丑進士安岳張任學。以監察御史巡按河南。求改武階討賊。遂改□軍都督府署都督僉事。河南總兵官。

建文元年。河南解元祥符張信。以兵部右侍郎。改錦衣衛指揮同知。終四川都指揮使。

景泰元年。山西貢士澤州侯爵。以父璉征苗功。襲錦衣衛正千戶。

成化□□□貢士王宣。襲武功左衛指揮僉事。

弘治己酉。福建貢士楊瑛。以虹縣訓導。襲汀州衛指揮同知。

□□□□四川貢士青神余寅以父子俊軍功襲錦衣衛正千戶

隆慶元年丁卯福建貢士蔡夢說襲龍岩所千戶

又閩縣林觀事文皇於潛邸累功至錦衣衛都指揮僉事嘉其篤實命署禮部郎

中奉使朝鮮仁宗即位勅鎮陝西宣德初召還仍掌衛事以金吾署文部尤奇

重舉鄉榜

洪武癸酉科吉水曾秩舉江西鎖榜同輩誚之改名高乙酉又儒士登科矢志不仕

永樂六年侯官鄭瑛以儒士薦應天癸未進士坐違例謫武當山督役至十五年丁

酉復薦湖廣

景泰四年順天解元廬陵羅崇嶽冒香河籍被革丙子復舉江西丁丑進士歷兵部

郎中

仁和汪諧竄籍順天景泰癸酉科被革還浙舉□□□□□□□□成進士歷禮

部侍郎

會稽陶大順竄籍順天舉嘉靖癸卯被革重舉浙江戊午科成進士歷副都御史

萬歷乙酉科北榜餘姚胡正道冒籍革辛卯改王國昌舉南榜官鄞縣教諭又洪武

三年。詔開科。內云仕宦已入流品。及曾於前元登科。並曾仕宦者。不許應試。而是年。福建鄉榜。閩縣陳信之。林文壽。並元進士。再中式。信之。懷安學。文壽。長樂學。建文元年。福建鄉魁第二人。莆田林泰元。閩縣知縣。夫建文初。扞詔容有之。開國始事。不應沮格。殆不可曉。

優免廩生

舊制。廩生斥退者。仍追廩米。甚苦之。成化九年。北京提學御史閻禹錫。引考察斥官。為比追從之。

莆田科甲之盛

莆田自洪武庚戌。至嘉靖戊子。凡五十二科。鄉舉千一百一十一人。甲榜三百二十四人。狀元二人。探花四人。會元一人。解元二十五人。宋時進士九百七十餘人。諸科特奏名。凡六百四十餘人。大魁五人。宰輔六人。

原始

鄉報急足。始嘉靖。□□其昔舉子。自備青袍。後官給不知所自。□選歷科程墨。始萬歷。庚辰。錢塘錢穀。穀號豐寰。膺貢。官曲靖知府。□會試房刻。始萬歷壬辰。

臚傳

鼎甲臚傳訖出長安左門京兆候迎謝恩畢宴堂上南向京兆北向席特盛用太常樂仍謝恩出京兆送歸私第茶別狀元同鄉宦京朝者例邀京兆讌之榜眼探花不預

故事御批一甲三人卷用玉管筆折卷在中樞殿左

庶吉士到院閣臣送入錦衣衛寘宴亦太常樂

程錄稱臣

鄉會試錄序皆稱臣外省則否以兩京輦下外省則考官所自序也萬歷初上摘此以問閣臣欲罪之江陵具言其故乃止後各省錄序俱稱臣

六預鄉房

武昌教授陳觀子瀾永樂丁酉應天分考癸卯及宣德丙午預考江西福建調荊州又預考江西福建正統辛酉又分考應天凡六預鄉試

三氏學

國初立孔顏孟三氏學設教授司教授一學錄一學錄即孔氏裔為之正統甲子始命宗生聽學使考入棘成化元年許三年貢太學

學宮祀顏子

兗州滋陽縣儒學祀宗聖顏子之神。與天下各學不同。泗卷志

廣文變例

天啟丁卯。杭州府教授饒曰梧。求計偕。教授從九品。例不會試。曰梧謂初受秩吏部。給據現在也。上官不能奪。會被劾去。

崇禎癸未八月。許應天府教授晉江何九雲會試。俄登第。

補榜

崇禎庚午。浙榜。仁和尚觀法。法字填補。向未有也。初。潘生館尚氏。冒姓尚觀升。補諸生。是年同雋。主考黃道周。嫌其昆季。以觀升改觀法。觀升走訴京師。觀法除名。先是。隆慶庚午。山陰諸葛一鳴。讀書山中。見人展一牘。云天榜也。問以己名。曰爾在下科。一鳴求增入。許焚楮幣虔謝。果秋捷。謂前事誕不足信。又計偕。見前人曰。若累我蒙譴矣。一鳴不聽。禮闈懷挾被革。事相去一甲子。適相類。觀升少年誕肆。屢因有司。遂悒悒不自得以死。

進士

進士不可太少。不可過多。太少則雄州劇邑不能充而無所彈壓。過多則不相貴。感而塞舉貢之路。嘗見鄒乎如著議。以為甲乙不甚相遠。請每鄉試計偕。即奉廷對。間擇其甚淺鮮無當者置之。使仍就鄉試。而其存者。即盡以甲次授之官。庶幾用其感銳之力。不使疲精神於帖括無用之技。且使上不以資格待士。而彰瘴明。士不以資格自負。自泥而驕怠不作。又可以省公車數萬之費。其論博矣。然士子學有深淺。才能有高下。譬諸草木。區以別矣。甲科之設。所以廣厲鼓舞。使天下之士精進勉力。而不能自。己。前人立此。良有深意。周禮命鄉論秀士。升之司徒曰選士。司徒論選士之秀者。而升之學曰俊士。曰造士。大學正論選士之秀者。以告於王。而升諸司馬曰進士。王者豈故為是繁縟哉。重爵祿。辨官才。如不得已。用人之道也。士取其秀。豈專感銳哉。今之諸生。即秀士也。應舉者。即選士也。舉於鄉者。即俊士也。進士。即升諸司馬者也。進士之名。來自成周。定自祖宗。惡能廢諸。蓋請以後會試。每房取正榜十人。再取乙榜二十人。正榜合之一百八十人。乙榜合之三百六十人。正榜則上親試而分三甲。仍照選資。乙榜則請以六十人任州。以二百人任縣。以百人為博士長。其京官則盡以陞任。不以初除。凡揀選就教等項。一切除去。舉人五科不第。皆不得再就試。

乙榜有不願就者。銅之終身。此法比之孚如所議。庶幾不甚扞格。

馮時可

棗林雜俎聖集

明 鹽官談遷孺木著

先正流聞

宋濂攻苦

宋潛溪先生集有送東陽馬生序云自幼嗜學家貧無書每假借藏書家手自筆錄天大寒研冰堅手指不能屈伸弗之怠錄畢走送不敢逾約既冠趨百里外從鄉先達執經問道先達德隆望尊門弟子填屋室立侍左右俛身傾耳或遇其叱詫色愈恭不敢出一言俟其欣悅則又請當其從師負篋曳履深山巨谷中窮冬烈風雪深數尺足膚輒裂不知也至舍四支僵仆媵人持湯沃灌以衾擁覆久乃和寘逆旅主人日再食無滋味之享同舍生皆被綺繡戴朱纓寶飾之帽腰白玉之環左佩刀右佩容臭燁若神人而已緼袍敝衣處其間無忤色云噫先生攻苦如此讀一過寸陰勤渠凜凜在目

周壽誼人瑞

高皇帝召耆老謁見崑山周壽誼居首年百十六歲賜宴及鈔幣按壽誼生於宋而

鄉飲於洪武六年。其六世孫震正德中令鄱陽。出人瑞卷。士大夫題咏盈尺。上海陸子淵先生深以編修使饒。跋其卷曰。三代而下。惟宋失天下為無罪。惟元興最為事變。嗟乎。能夷人數百年宗社於強弓健馬之間。而不能禁一老坐觀其子孫之復覩天日。何其快也。若壽誼公之壽。足以繫興亡之故。豈淺鮮哉。且手挈華夏之禮。以還華夏之主。於克華夏之日。何其奇也。公六世孫震。字世亨。以名進士。筮仕鄱陽令。嚮往未艾。是能輔毘華夏之道。以昌公之世者。則又不獨為壽而已矣。世亨其懋之哉。

唐伯逸

南昌監生唐伯逸。洪武七年任僊居典史。嘗謂取民財。如取鷺鷥股上肉。誠心愛民。一塵不滓。仙居縣志

鄒傑復姓

洪武九年六月。科給事中鄒傑。於東閣奏。臣祖孫福謙。陝人也。出守嘉興。元亂航海。舉家溺於登州。臣附餘板得活。傭于登人鄒義。時年十四。養為子。冒其姓。今貢成均。進用。乞復姓孫氏。許之。諭毋忘鄒氏。

賈魯斥佛

廣西宜山賈魯。洪武辛卯貢士。授崖州學正。改瀘州。性不喜浮圖。訓子綱約。筆皆儒業。諭以沒後當依家禮。毋作佛事。否則必禍汝。後魯卒。子迫於姻黨。召僧設齋。事訖焚楮。忽飛烟焚其室。平樂府志

遂宏言事

錢塘逸宏弱冠時。以郡諸生言時政得失。上說之。試秋。柳賦稱旨。賜歸。後送貢。終

松江訓導。

錢塘縣志

周魯章蓑笠

新喻周魯章文瞻。洪武末。舉明經。召為選部主事。不就。上賜蓑笠。令歸。教民稼穡。

因號明農隱逸。

臨江府志

蔡新童婢

崇德蔡新。父為人。酖死。新誓報奮擊之。下獄十三年。家童阿小。年十五。禿髮。稍識書。籲天求白。主寃。積麵作餌。攜之乞食。至京。擊登聞鼓。歷十三疏。始得白。初阿小北去。家僕婢二人謀逸。婢攘臂曰。主母莞莞。恃吾二人。若可去。吾當終事之。日刈草二百斤。半供紡。半曝之待風雨。即孝女不啻也。永樂癸卯。新舉於鄉。官臨淄令。厚贖其婢。

年至九十二崇德縣志

徐樞

松江徐樞叔拱。太醫院判。宣德元年省墓。上聞其老。詔出宮人陳氏偕內官陳福。袁亨給事。明年致仕。後沒。三人皆從葬。

于謙

于少保有寄內弟書云。薄俸五錢。

地師某云。少保祖墓富奇貴不可言。少保即馳書其子。令遷葬。另一緘俟遷葬訖啟。視子冕得書。移奠如命。始啟緘則述地師事也。不半載遭禍。今書稿藏於家。張九

李秉蒙迎駕詩

土木之難。李襄敏從征脫歸。進戶部郎中。夜夢作詩送楊鴻臚。善迎駕。天恩寵渥。作鹽梅。迎復。上皇出紫臺。羣口潛跡歸朔漠。六龍回駕入蓬萊。明日以語同官。次年

八月而驗。曹縣志

尹恂尹直

尹相國文和真。作兄恂墓志銘云。以靖州衛吏。任順天湯山草蕩大使。廣東廻岐巡

簡司巡簡。成化元年正月十六日。禦口死。夫尹氏。歷城人。吏賤役。必遠隸靖州。又最下秩。且戰沒。不求卹。先輩雖穹貴。于戚屬無私厚。其戚屬亦無望其私如此。今纔入科第。戚屬借粟監例貢。輒思丞倅京幕。羞以吏進。故錄之以存古道。

楊瑄

浙江按察使楊瑄。豐城人。成化中。築海鹽捍海塘。堅壯有碑不存。邑人仇俊卿曰。昔呂梁碑。磨泐可認者止三十六字。人皆惜之。想見禹功。而楊公之勒一字無存。感更為深。自不能泯。當知繫人心者不在碑之有無。萬歷乙亥僉事。晉江陳詔來修塘。入楊公祠不揖。背像而坐。亡何。詔口作公語曰。我堂官也。汝敢無禮。我將殺汝。尋疾作。禱之始愈。海鹽縣志

王恕

王端毅冢宰。日有御史李興。巡按關中。酷刑殺人。至三原。斥公名而詈之。後罪人多。罪當大辟。又御史韓雍。值點郊齋。入部堂。中道呼公名。時議輕薄。當斥。公奏興雖酷。無私可免。雍直而有才。可超遷。從之。淮銑端毅配蓋夫人。繼張氏。文氏。並贈一品夫人。按成化四年。南京御史楊智等劾南京刑部右侍郎王恕。不顧名節。託本部郎中

黃紱娶故劉指揮妻文氏為繼室云云夫以端毅之賢言動不苟臺榭風聞斷不足信。

王存忠

仙居王存忠。成化丁未進士。歷御史。□□知府。無錢市靴。詩云。分付兒曹休指望。好將芒履印蒼苔。其清苦如此。仙居縣志

楊守陳故宅

楊文彛故宅在鄞縣南二十里。鏡川初未登仕。至公兄弟俱顯。接籍蓋七人。有野叟獻詩曰。昔年曾向此中過。門巷幽棲長薜蘿。令祖先生方振鐸。賢孫學士未登科。將軍曹氏墳連壘。賣酒王婆店隔河。今日重看新第宅。烟波緩棹聽絃歌。公嗟賞不已。謂叟曰。此詩誠吾家傳也。當珍藏以貽後人。欲厚幣酬之。叟固辭而去。

楊循吉論定

楊南峰先生作子胥鞭屍論。夜聞山中鬼哭曰。腕可斷。筆不可改。

包德懷嫁友子女

蘭溪通判鄭璫温卿。記鄉先達包侍郎德懷。在京與同鄉胡主事文善。主事疾革。往

訣主事止一女。以託侍郎曰諾。既主事與妻相繼沒於京邸。侍郎抱歸其女。囑其妻育之如己女。後女長。擇壻祝氏。將嫁。侍郎居與主事相去二十里。其故宅猶在。乃先令人以竹簾分隔其廳事為三間。己處左。妻與女處右。中設主事神位。至日備祭。告嫁事。命女拜。己侍郎長號痛哭。然後行聘。遣嫁。奩具皆備。金華府志

周廷芳

蘭州周廷芳。小泉。守墩卒也。一日讀大學有悟。遂究五經。篤信力行。恭順侯吳

請教其子。對以往役則可。往教則不可。志節高峻。言不空發。呂涇野集

周鑑

周鑑字孔明。麻城人。正統乙丑進士。授御史。出按江西。有大學士陳循子。不法。鑑論之。死。遷雲南副使。九年不遷。鑑所至。汰墨理枉。仍開寶泉壩。積水溉田。多至數萬頃。後考績入京。行江中。舟覆。幸無恙。陞山東按察使。致仕還鄉。鄉人布政李正芳。僉事董應軫。並有雅望。邑令立耆老堂。凡大事。輒咨此三人也。

陳恪水清玉潔

歸安陳大理恪。以方伯家居。歲歉。饘粥不給。薦者謂水清玉潔。孝宗題此四字御

屏。

邵竇絕巫

無錫邵竇國賢。知許州。弘治癸丑五月。鄭州某鎮地陷若干丈。水溢。民爭禳之。六月。許州小趙鎮。有巫言龍骨出土中。誑言禍福。邵以惑衆毀其骨。督學江西。攜試牘歸家。久而紙敝穴地瘞之。

吳翰詞

吳翰詞。字子修。應山人。嘉靖庚戌進士。知棗陽縣。清約節愛。不附權勢。民愛之。拜御史。任事不避艱險。按雲南。風采卓然。當是時。嚴嵩勢張甚。御史報命。不勝賂。翰詞遂乞告。杜門結友。性耿介方直。一介不苟。燕居整肅。宗人亦不敢近。舊居數椽。比卒。以敝緼。今棗陽雲南皆有祠。

潘塤

淮安潘中丞塤。□□丁卯舉於鄉。郡守趙公俊書聯。取功名富貴。屬對。塤舅氏少司寇。虛齋葉贊。過而見之。歎曰。纔出門。便教以功名富貴。塤聞。教悚服。

蔣信

蔣信字卿實。武陵人。諸生時貧甚。郡守憐之。令捧詔屬邑。例得津贍。信却之。王守仁龍場之謫。道武陵。從學。然自有所見。不盡主其說。貢南雍。祭酒湛若水俾至。諸生故事。嘉靖戊子。舉南榜。壬辰登進士。歷官兵部員外郎。四川僉事。貴州提學副使。以征苗。捧檄即往湖北。議兵餉。不及辭。御史謂擅離職。削籍歸。不問生。產關桃園精舍。與郡中子弟誦業。其教人大抵主慎獨。篤倫修行。明理通世務。在桃園十八年。年七十卒。臨終賦詩。歸去桃園十八年。歌游多在萬桃間。萬桃於我浮雲耳。願借西風吹上天。投筆而逝。世稱道林先生。所著粹言若干篇。

劉大夏格言

劉尚書東山先生曰。財貨須務農服賈。凡力得者獲用。其餘易致之物。終非己有。子孫視之。亦不甚惜。况官貨悖入者乎。

李東陽侑歌

李西涯飲陳都憲德卿。曾司業振之。邵太常國賢。崔郎中世興。何郎中子元等酒半。李曰。國賢吳人。振之楚人。聞皆善歌。歌以相和可乎。遂出近詩數十首。俾歌之。陽春堂集

陳察御史騎驢

常熟陳察明遠。任御史。按蜀。乘驢。布按皆跨馬。減其驕從。按御史出巡。舊騎馬。後乘輿。不知起於何時。或成化後事。浙有舉子王化。大帽見按臺。某某呵之。問所起。對曰。即起於大人乘轎之年。

魏庠廳旁塚

崑山魏庠子秀。納貲任光祿寺典簿。其廳事旁有荒塚。邑令郭楠造而問故。對曰。其子孫欲售之久矣。子之直。彼不以治生。而棄骨於水火。故甯存之。今歎曰。杜氏之墓在西階。古人之義也。不意今日復逢於君。咨嗟良久而別。歸有光集

清吏張守約

張守約。字彥博。岳州人。嘉靖丙戌進士。知華陽縣。歷崇德。遷南評事。寺正。擢知淮安。淮安素難治。守約遣孛歸。單車攜二蒼頭之任。闢園植蔬。自奉儉約。禁絕官市。常俸貯之帑。間出以賑困乏。性嚴峻。蓄家人少恩。二蒼頭日啖脫粟數合。鶉衣拮据。憤恚不得逸。一日乘守約寢。刺殺之。僚吏聞變。急來視。守約息僅屬。瞑目語之。故遂死。檢所遺。惟二敝篋。篋中書數束。敝裘數襲而已。衾褥帷帳。咸綴浣汗。裂靡堪御者。二蒼頭竟伏法。

朱良育不受封

吳縣朱良育積學不第。膺歲貢。子鴻漸。進士官主事。貶封不受。竟明經沒。

杜了翁言行

廬山老儒杜了翁。曰。道在論語。言忠信。行篤敬。求之四十年。未有得。或曰。道豈言行盡耶。曰。言行君子所以動天地也。若外言行而講道。吾不願聞。時王陽明先生倡學東南。了翁不至。

熊鳳文不踴選司

熊鳳文以□□推官行取。不踴選司。太宰許進曰。推官不能誦滕文選。令為御史。肯畏強禦乎。竟拜御史。

桑桂移風社

平涼桑桂成化貢士。官大名通判。廉靜好古。與同邑彭會。趙天錫。倡移風社序。

曰。平涼山水秀拔。人習淳樸。業惟耕讀。確有古風。比年喪亂。不古。俗信浮屠。誑惑於始死及七七百日期年除喪。飯僧道。作水陸大會。寫經造像。云為死者減罪。生天受諸快樂。不為者必入地獄。剉燒春磨。受無邊苦。是以貧者弗獲慎終。惟備神馬楮幣。齋

粃蔬果。經資之費。力不能逮。則淺土經年。蟲蠹鼠穿。富者忘哀作樂。談經餽金。飾備
備器。務為繁勝。傾家破產。迷惑不悟。殊不知生含血氣。知痛癢。剪爪剃髮而灼刈之。
已不知苦。死乃離形。腐於黃壤。與木石等。神則飄若風灰。雖判燒春磨。將安施乎。然
浮屠所謂天堂地獄者。蓋以勸善懲惡耳。世人親死而禱浮屠。是不以親為君子。而
例視為積惡有罪之小人。何待親之薄耶。縱使其親積惡有罪。豈賂浮屠所能免乎。
此則智者所共知。而愚夫滔滔奉信。風靡無已。桂等生長是邦。讀聖賢書。浩歎頹風。
思與易之。相為立禮社。名曰移風。嗚呼。風不可移也。所可移者人心耳。人心雖為頹
俗所染。而天理之在人心。終有不能泯者。能以吾心之天。感彼之天。則澆必轉。濇邪
可變。正曾謂風不可移哉。凡我同志。敦崇禮誼。毋懷彼此。毋間嫌隙。凡遇鄉鄰朋儕
之喪。務為天理開導。法語匡直。斷以朱文公禮制為準。熄佛老尚哀感。貧者喻以義。
富貴制以禮。其間古今異宜。斟酌輕重。一求合乎中正。黽勉戮力。人心欣動。舉知為
美。始而正一家之風。終而正一國之風。何患禮之不復古哉。雖然。士君子立身。進則
有功於君。退則有功於民。奚獨喪禮耶。患難相助。疾病相扶。道義相尚。德行相勵。過
失相規。使行業齊於古人。芳聲耀乎當時。而天下之風亦可移矣。夫子勗哉。

韓昌

韓昌。洪洞人。世醫。昌精其術。不計貲。施藥。先貧後富。嘗見御者卧道中。憐之。診其脉。傷寒。為移煖室。藥之。汗愈。乃行。資以粥。未。洪武初。避兵岳陽山中。遇異人。授以秘術。遇疾。不俟診視。望之而決生死。時稱神醫。孫肅七歲。誤吞鐵釘。昌曰。此兒不死。毋憂也。三年而出。他日且生貴子。後釘果從脇下出。己生文。官戶部尚書。

毛中丞里居

陽信毛海隅先生思義。以南京督儲都御史致仕。呂涇野先生柎問公歸邑居乎。曰

然。菲屋數間對縣學。呂曰。久宦何尚菲屋。曰。自官主事來。俸餘一二十金。歷三十年。婚子四。嫁女二。又親喪久外。未治室也。呂曰。公歸亦何樂。曰。子師張先生高健。友人董某。姻家王某。並尚在。與割雞漉酒以熙餘生耳。涇野集

景暘孝感

上元景司業伯時暘。母陸太安人。晚瞽。數年所至求醫。卒得金針於京師。復明。肯庭萱條大如杯。初司業涕泣樹萱曰。萱花母療。三年不花。至是花緒。

胡松抄書

滁州胡柏泉太宰。少貧無書。時時借抄。手輯名臣奏疏。置枕曰。經理天下在是矣。

鄭慶祛蝗

嘉靖九年進士。長樂鄭慶有章。知滁州。夏至。滁及秧。有蝗自西北來。蔽天日。丘陵墳
行麻沸。所至禾黍輒殫。民男婦奔競蔽野。君簡勤敏吏民十數輩。部分之。令各詣蝗
所打捕。張幟縱金。舉火開塹。又嚴為禁防。俾勿擾。蝗為哀。其冬下令國中曰。蝗善滋
土。必遺種。茲不掘。害將何極。其發子。毋俾流毒於我。茲土得亡。真明年。蝗果生。息至
蕃。徧野。復令毆捕。如往年法。加密。諸庶人在官者。悉罷遣如初。僅留門子一人侍。又
下教曰。有能捕蝻斗者。官與穀五升。石者與五斗。以是人爭捕。得蝻數百石。蝗倍屢
種。幾殄絕。有秋。當其時。雖不能微怨謾。而潛膏隱澤。其被與要自遠矣。滁州志談遷
曰崇禎辛未

嘉興亦募民捕蝗
與穀竟升合不給

嘉靖丙午。延津大蝗。有司遣人捕之。廩生周宦。恐人不盡力。乃自白於人。有能捕蝗
一石者。即與錢百文。人爭捕之。不旬日。以錢百千。置蝗千石。邑境蝗不為災。延津
縣志

王勅雲母

歷城王祭酒竹泉。初少得道術。後督學河南。試諸生。見白雲出山。急遣人十數里外。

視雲落處。掘得白石如雪。歸切片。煮為腐。甘美非常。曰此雲母也。

徐階論士

徐文貞公曰。欲觀士大夫名節。但不聯姻富室。不接衽山人。便是端莊之士。馮元成集

林思承致仕

莆田林思承。官淮安同知。致仕。所親止之曰。公旦夕金紫矣。思承曰。心苟知止。一命有餘。若其無窮。三公不足。

唐樞

歸安唐樞一卷。先生論博施於民而能濟衆。重能字。蓋人亦有施而不能者。政不善也。

今人但知顏子不校難及。不知一犯字。學他不來。弟子謂曰。何謂也。曰。顏子持己應物。決不得罪於人。故人有不是加他。方說得犯。若我輩人有不是加他。必是自取。所謂夫人必自侮。然後人侮之也。何曾是犯我輩。未須學不較。須先學他犯字。李梁見聞雜記

唐順之

唐荆川先生論易。爻有吉凶。大象獨言吉。此聖人示人直入聖道路也。

高拱知人

高中玄相國。署吏部。日戊辰進士。選秀水沈思孝等八人。分令廣東。俱目矚得之。並

歷侍郎。其一中丞。

沈繼山先生說

張尚書學顏僉事。皆賞捧入都。相國一見喜曰。今日得一督撫矣。

錢御冷說

張居正急才

張太岳編修時。本院公議。演千金傳奇。至蕭何追信。凝視久之。同列以專注譴之。答曰。君臣將相遇合之難如此。毋得草草。蓋江陵意自有在。非同戲謔。山陰吳克環洲。出高文襄之門。以器識見重。時輒諮訪。呼為吳學究。蓋水滸傳中智多星也。俺答孽孫那吉初降。文襄議同江陵。以問克曰。可受之。有喻於此。如麵二石。作一大饅頭。須大金大籠。文襄遂意決。後文襄罷。江陵盡斥其黨。獨克不廢。或媚江陵刺及克。江陵曰。吾固悉之。但難其代。累遷少司馬。而速把亥擾薊鎮。江陵語冢宰。為我致吳環洲。能出鎮乎。克聞之曰。某待効塞上久。犬馬猶暫息之。相公猶未忘我耶。江陵得報曰。否否。此原環洲意。可再質之。冢宰告克。克謝曰。往疏雖及此。第薊鎮戚繼光。遼鎮李成梁。兩大帥。未易節制。須尚書銜。江陵曰。不可。第往。勿憂。不尚書也。克出鎮薊。遼事

定果進尚書。終江陵。克無纖芥之嫌。敬御冷相國說

浙江缺督學。選司以某人擬。江陵弗首肯。選司却席請間曰。其泌水劉東星乎。東星

在浙。藻鑒得名。歷總河工部尚書。張統山先生說

徐階李春芳陸樹聲

青浦慧日寺落成。少師徐存齋階做東坡解帶事。奉世廟所賜蟒衣一襲。付僧圓

實。留鎮山門。因賦一絕。單衣露冷宿曇華。悞縮宮袍傍帝車。拈向山門君莫笑。綉若

還是舊袈裟。萬歷丁酉。大宗伯陸平泉樹聲年八十有九。出衲衣一襲。手書偈曰。解

組歸來萬慮捐。盡將身世付安禪。披來戒衲渾無事。不向歌姬為乞緣。嘉靖丙午李

文定春芳將入秋闈。宿句容寺。題壁。年年山寺聽鳴鐘。匹馬西風憶遠公。他日定

須留玉帶。題詩未可着紗籠。及入相歸。解玉帶留鎮。

姚弘謨迎母

秀水姚少宰少孤。母改適。登第後。迎養於家。

袁洪愈貧宦

長洲袁安節。清介絕俗。雖善嘔。貧不屬饜。每市蜺佐酒。可竟斗許。門生嘗餉十金。輒

三分之袖其一。乘月步贈窮交。其貧多繇此。訪王元美留竟夕。俄接家報中歎。元美問之。方負進二十金見迫。即代償之。以盡其懽。後解南太宰。薦元美自代。元美起南少司馬。嘗戲曰。吾生平此二十金用得着。

喻叔虞說

余有丁家祭

鄭縣余相國文敏。父永麟。幼穉時育於小江里余氏。後鄉舉。歷蘇州通判。生文敏。既貴。當贈三代。莫知所自出。不得已。贈永麟。所後父。慚。慚。父鐘。而命子孫家祭。自蘇州公始。禮因義起也。

文敏少從宦蘇州。慕崑山歸有光名。將師之不果。嘉靖乙丑。文敏以編修分闈。拔有光第二。

沈思孝在戍

萬歷丁丑。沈比部純。父劾江陵奪情。戍神電衛。游某山。剝鮮見石刻翠巖亭三大字。旁題謫仙三百載。此樂有誰傳。鐫宋某年月日。因推今日。正三百年也。巡臺徐時可欲辱之。示期閱武。純父短後衣橫矛。踞罵於演武堂。遂不至。總督臨武劉堯誨。檄高州同知劉石。令以戍見純。父應役中道止之。環召時。總督長樂陳瑞。得報方啜茗。失

甌碎地責中軍曰城內有謫臣何不我告亟通幣起居且致賀必求面純父行迫不往遣蒼頭報謝賜茶中堂語次泣下姚叔祥說

戚繼光

戚少保鎮薊門駐三屯營最久經畫周詳有祠總兵尤繼先之任不拜祠口口除夕公庫災獨題梁及銀牌存牌重五兩題梁年月少保所記也繼先歎戚公神人刑牲以祭

馮少墟規鄒南皋

鄒南皋元槐居鄉好言事操月旦長安馮少墟先生嘗戒之絕不與聞一事

申時行李廷機薄殯

吳縣申文定相國捐館屬其子太僕用懋曰先人殯並非川木勿貽我媿

晉江李文節相國捐館門人蔡太守善繼議用川木李夫人曰相公一生清節囑身後棺止直六兩不敢背其治命

李廷機鳩工

李文節宗伯時語李湘洲祭酒鵬芳曰國家工役切莫先估計估計皆內相大臣為

政彼但索己橐。故一倍至二三十倍。吾不先估計。且孟浪起工。彼雖日有所需。然不能計成數多少。工止而彼散矣。更無積聚錢。俟彼分贓。

趙大華

萊陽趙大華。任鄆陵令。邑民以不紡績。大華勸諭。夜行潛聽。有紡績聲。以良民勤紡。四字識之。次日呼至。賞棉花五斤。自此得紡之利。及今永賴。

李騰芳

李湘洲曰。每見士大夫一捐館舍。其子弟往往向人稱外侮。人亦為之傷世態之炎涼。歎人情之惡薄。予以為不然。君子生則人敬。沒則人思。彼寂寞於生前。而榮華於身後。為人尸祝俎豆者。何人哉。人必自侮。而後人侮之。向使恃位挾勢。欺凌侵奪。人無奈何。直待其子孫。方與覆算。此所謂悖出悖入。出爾反爾。而稱外侮。非矣。

張臣感慟

麻城梅衡相中丞。國榑。筮仕固安。總兵張臣過邑。彼宿將。逐虜棒槌崖。殲數千人。時

繩其冒功。公獨加敬。張驚問。答曰。棒槌崖之捷。從來未有。我敬子以天下豪杰。非以其官也。張不覺大哭。伏地。歎曰。某血戰一生。天子不知。大臣不錄。今公獨知。某雖

即刻死公前不恨

王汝訓散貲

王侍郎弘陽本富室。以父防盜。晨夕不安。勸散其貲於親故。十去其五。父得夜息。侍郎後益貧。授徒里中自給。室不能牖。填輪通照。農具雜陳。了無宦緒。張統山先生說

唐文獻

上海唐柳所先生。署翰林院篆。沈四明當國。移檄求印。輒稽之。雖四明不快。然無以奪也。內計時有所去留。並未嘗請命。錢御冷相國說

唐諡文恪。所謂易名之典。仍犯其名何也。宜如陳莊靖文例易之。

陳滄孝紋

淳安諸生陳滄。父性嚴。事之甚謹。廬墓三載。奉庶母如嫡。撫庶弟孤姪。晚歲手紋成孝字。山陰王思任題孝紋堂。

顧憲成寡欲

無錫顧涇陽先生。少時讀養心莫善於寡欲。反之寡欲莫善於養心。最有味。

衛一鳳辟狐

陽城衛桐陽大司馬。前守青州。有樂婦崇於狐。聞鼓聲堂上曰。尚書正人也。義不敢

迎。鄭繼之。

襄陽鄭鳴峴太宰。留意品鑒。典銓時。殆八旬。於士流素履。口誦不爽。

彭應參。

萬曆甲午。光山彭侍御按浙。風裁峻厲。不畏強禦。烏程董尚書份。吳江范祭酒應期。並怙勢扞網。繩其悍奴。范至自經。董嗾其婦吳氏訴於朝。詔逮侍御。後放歸。

詹景鳳。

詹中岳。任南京吏部司務。凡部曹謁總憲私第。例趨左門。惟銓郎至儀門外。延於別館。詹謁右都御史海公瑞。獨拱立。直馳中道。抵門。踣閭而言曰。敝曹統領縉紳。闕左右門以奔走人。而奔走人左右門。如體統何。其後復徇海公事。詹切責之。

許弘綱責子。

東陽許少薇總憲。還里。鄉人送柴。問之。云例也。召責其子私權杖之。

葉向高講學。

葉臺山相國見鄒南阜先生論學曰公講孔孟子只講閻羅王鄒問其故曰不佞老矣填溝壑之日近苟有欺君悞國傷人害物招權納賄等事於閻羅王殿前勘對不過者皆不敢為鄒笑而是之

李九我相國晚戒文筆福清欲效之李曰子效我殊難我面嚴冷人不敢強子面善無以謝其求也力不能兼可廢詩耳

吳道南

崇仁吳文定相國語嘉善錢太史士升曰若初入翰林須記三事不擬試目不受門生不出游庶保名節

竇子偁

竇子偁可揚按察兩浙剛毅敏決雖婦孺知其名遷右轄以御史沁水孫居相薦之時方指居相東林黨魁也歷官守法不附一廉如水竇自是議絀解官去不復出子偁萬歷壬辰進士

徐光啟

華亭徐文定初以右春坊右贊善兼□□道監察御史監軍出倉卒特授偁從不備

自募人肩輿。

楊瀚

陽城楊瀚。神觀頎偉。萬歷□□舉於鄉。宰甯遠。為盜數。治尚嚴細。道不拾遺。調良鄉。赤縣衝瘠。其治如甯遠。而稍馴之。民犯博者。褫其衣。給驛卒。自題門帖曰。門如市。心如水。一塵不染。提得起。放得下。百事敢為。奏最。限乙榜。量移南京大理寺評事。在時為右遷。尋致仕。素善酒。嘗飲邑令張文運。張連浮大白。歎曰。令君可人。

馮氏義僕

華亭馮御史恩。次子□。可家幹馮良。託以筦鑰。□可沒。子大夏蕩廢。棄其家。依妾金陵。十餘年不歸。良每歲收田租易金。即篋藏之。不私一錢。良久。覓主歸。以所積萬金還之。大夏遂為富人。後大夏沒。諸藏金。為他房瓜分。良又不取一錢。人稱其厚。良子三。皆諸生。孫明玠。天啟壬戌進士。歷御史。良原

葛寅亮督學

錢塘葛岷瞻大理。前督學湖廣。每行部。謁孔廟。輒命諸生講書。次第數十人。默定優劣。有講回之為人。也節。聖人撒手是道。賢人尚差一地。位。故拳拳服膺。葛大賞之。

丁賓老不忘孔林

嘉善丁清惠尚書年八十。崇禎庚午三月。特北謁孔林。償宿志。

朱國禎秀才氣

丁清惠與烏程朱平涵相國善。謂其居台鼎。猶秀才氣象。相國笑曰。原是老秀才。近來庶幾葉臺山。無閣老氣。

朱氏世攻草。相國不殖產。曰。我何敢忘祖父攻草守藏時事乎。

沈演四友二老

歸安沈何山尚書。作四友二老圖。身與王太宰永光。畢司徒三才。李宗伯騰芳。曰。四友與張總憲延登。曰。二老。俱萬曆壬辰榜。崇禎初起家。

董其昌

華亭董玄宰宗伯。坐部堂上。朝鮮貢使謂為異人。夏給事子暘。使琉球歸。求董書。貽其來使。

錢士升

嘉善錢塞菴相國。先號御冷曰。士大夫鄉居。止宜杜門。不聞一事。若曰欲作好事。便開罪。

端蓋身非有私。而因緣旁入。安能預察。而盡中其緊耶。

好人之所惡。惡人之所好。是謂拂人之性。若好人之所好。惡人之所惡。亦拂己之性。經正則庶民興。史熟則名臣出。以上俱面說

陳組綬結客

武進陳伊菴官兵部。□□□□結壯士千餘人。皆漁陽大俠。時勞以金帛。及卒。或欲收其客為列校。客曰。我等激於義。為陳君效死。豈肯仰文吏鼻息耶。哭其喪而散。

陸夢龍

餘姚陸參政夢龍好談兵。先是黔中閱軍。令七校各魚貫進。身坐貢院門。禁闌入。初軍多更番遞應。至是術窮。第七軍高拱北。稱四百人。閱試止五人。立斬拱北。先後汰萬人。

張燁芳

山陰張燁芳曰。人而無友。不如有仇。仇亦足祛人眉宇間窳惰氣。按燁芳居鄰。陳

都諫爾翼都諫燁熾時大不能堪。俄都諫以黨敗。燁芳成進士。嘗演魏忠賢諸劇。陳

隔聽亦不能堪。燁芳官給事中。被謫。壬午補翰林待詔。道臨清。值北兵匿於道院。發

其裝得進賢冠徑尺。令諸人戴之。俱不合。獨宜於張被殺。贈太僕寺丞。

吳麟徵家訓

海鹽吳忠節家訓曰。莫道作事公。莫道開口是。恨不割君雙耳朵。插在人家聽非議。莫恃築基牢。莫恃打算備。恨不鑿君雙眼睛。留在家堂看興廢。

熟讀經書。明晰理義。兼通世務。世亂方殷。八股生活。全然冷淡。農桑根本之計。安穩著數無如此者。詩酒聲技。非今日事。

柯起鳳不負丞

休甯縣丞柯起鳳。四川□□人。以廩生膺薦。不卑其職。才守自勵。遇事敢斷。凜若神明。臺司委決無虛。日聲出令長上。為各司理所嫉。搆之去。郡人祖送傾市。竟任不私一錢。吏部尚書鄭三俊嘗追訟其事。

王朝堂死孝

流寇陷太康。諸生王朝堂。以父中丞□□。柩見斫。拊棺拒罵。被殺。棺得全。

明 鹽官談遷孺亦著

藝賞

諭幼儒勅

太祖高皇帝諭幼儒勅。有曰。蓋於馬退山茅亭記。見柳子厚之文。無益也。柳子厚之兄。司牧邕州。構亭於馬退山之巔。非勞人而弗成。既成而無益於民。是害民也。畧不規諫其兄。使問民瘼之何如。却乃咏亭之美。曰。因山之亭為基。無雕椽斷棟。五采圖樑。以青山為屏障。此雖無益。文尚有理。其云白雲為籬籬。此果虛耶。實耶。談遷曰。讀聖諭。得作文真訣矣。存誠去浮。根理資用。今曲學矜句字之間。沿誕謾之習。於文體人品。不相研切。如五柳先生傳。先生不知何許人也。蓋淵明寓避世之意。可一不可再。而白樂天陸龜蒙輩。效之則誕矣。虛實之論。誠如宸諭。

宣尼遺筆

孔林石刻。宣聖遺筆。暑往寒來。春復秋夕。陽西下水。東流將軍。戰馬今何在。野草閒花滿地愁。末書仲尼有章款。此作偽者。真東家丘耶。

顏子

國初朝鮮獻顏子以偽書卻之

海鹽秦駐山始皇碑

前賢灼灼。後聖懋哉。始皇承天。越受帝命。業超上古。殲周滅鄭。七雄靡餘。六國是併。功齊太古。道深前王。埒炎均昊。美冠顯黃。靈七代。敬構商堂。縱聖凝神。將記百
掩藹餘輝。蜚聲萬禩。梁天監二年八月二十三日。右判史敬素立石。海鹽縣志此碑。史記
不載。而鄭亡久矣。謂始皇滅鄭何也。

偽書

毛漸偽三墳。張昇偽元命苞。孫定偽關尹子。阮逸偽元經。宋咸偽孔叢子。徐靈府偽
文子。戴師愈偽麻衣子。袁康偽吳越春秋。
明寬山王逢年。偽天祿閣外史。海鹽姚士彝。偽於陵子。

嵇康真蹟

錢塘楊廷筠。以御史督學南畿。有兄弟爭嵇叔夜手跡。弟請田三十頃易之。致訟。御

史命立寶書堂。公貯之。

王大令洛城賦

王子敬小楷洛城賦顧凱之畫其下。藏內鄉張康侯家。購以五百金。康侯甲申避寇金陵。張統山先生借觀。

雲麾將軍碑

萬歷六年。河南李蔭宰宛平。構小齋。發礎得唐李邕雲麾將軍碑。碑石無沒。良鄉驛舍。裂為柱礎。可辨字百八十有九。首篆存。唐故雲三字。蔭輩貯邑署。名其齋曰古墨。終戶部主事。李邕書在蒲城縣西十五里李思訓墓上。

百家姓

百家姓相傳宋人作。故首趙。南雍志。有唐虞世南百家姓一卷。

蘇子瞻制義

蘇長公外集。有孟子義一首。蓋宋以命題試士。士之應舉。制義概如此。題以佚道使民。以生道殺民。我使民為農。民曰是食吾之道也。使民為兵。民曰是衛我之道也。使民為城郭溝池。曰是域吾之道也。雖勞而不怨。曰盤庚之民。何以怨。民可與樂成。而不可與慮始。蓋終於不怨也。詩曰。晝爾于茅。宵爾索綯。亟其乘屋。來春播百穀。可謂

勞矣。然民豈不思之曰。上之果誰為之也哉。若夫田獵之娛。宴好之奉。上之人所自為之者。君子蓋不以勞民也。古者水衡少府。天子之私藏。大司農不以給共養勞費。出少府為是也。孟子曰。以佚道使民。雖勞不怨。以佚道使民可也。以生道殺民。君子蓋難言之。易曰。古之聰明睿知神武而不殺。季康子曰。如殺無道以就有道。何如。孔子曰。子為政。焉用殺。夫殺無道就有道。先王之所不免也。孔子諱之。然則殺者。君子之所難言也。

大學本義稿

朱文公大學本義稿。友人沈世泊嘗見之。多刪抹。

朱文公集

慈谿謝象三三賓於亂時購宋板朱子集。纔十金。亡何又得宋板朱子集。文頗不同。

多世所未見。包長明說

心史鐵函

崇禎戊寅十一月八日。蘇州承天寺。浚智井。得鐵函。重積。啟之。宋鄭所南先生心史一部。外標大宋鐵函經。內書大宋孤臣鄭思肖百拜封。自元世祖癸未。歷今三百五

十六年。按心史行世久矣。想副本流傳。不待智井啟函也。

宋濂

宋學士。著作最富。潛溪前後集。在元季已盛行于世。入明。劉伯溫選定為文粹十卷。門人方孝孺、鄭濟等。又選續文粹十卷。皆孝孺與同門劉剛、林靜、劉璉、手自繕寫。刊於義門書塾。丙戌歲。錢謙益於內殿見之。孝孺氏名。皆用墨塗乙。蓋遵草除舊禁也。

道餘錄

姚少師廣孝。別號逃虛子。摘二程先生遺書二十八則。朱子語錄二十一則。逐條析其謬。曰道餘錄。吳縣行人張供。見即毀其書。自謂所以報少師耳。

御史試豈芽菜賦

蒙城陳疑。荐賢良方正。考選試豈芽菜賦。疑第一。拜浙江道御史。終□□按察副使。賦曰。南國之賓。客於上國。與北都主人。論辨時事。翌日請於主人曰。子居上都。俛視八隅。日覽天下之奇物。亦知天下之奇味乎。主人曰。唯唯。客何言與。天下之味。形類萬殊。燧人作備。庖人之初。曰載曰鸞。曰黍曰芻。八珍甲四海之美。五味極六合之腴。

猩唇豹胎之鼎。熊掌駝峰之厨。趙普掣蠍之炙。何曾鵝掌之殊。黨家之羊羔美酒。五侯之燕醢鯖餘。所吳中之膾。釣松江之鱸。駕醪施蓼。雪蛆侑俎。簌蒲羞鱉。罍醬滌驢。至若橙黃而螃蟹實。荻綠而河豚來。黃雀入幕之子。烏鷄啄粟之雛。加以椒桂。益之以油酥。當嘉賓之既集。命細君而當壚。巨觥淺酌。豔曲呶唔。調嚼滋味。既美且都。客曰。子惟知葷腥之為味。而不知清楚之嘉蔬也。主人從而改曰。北山採蕨。南山採薇。祛萱堂北。檐芹澗滑。烹綠葵之嫩葉。儂白薤之芳蕤。補羸杞。移繁蕪。麻姑縷分於淮術。波稜寸斷於躑躅。酣糟子姜之掌。沫醢新笋之絲。梭魚孕子。苔脯乳鬚。輪菌九沸。山藥三坎。漢家丘嫂之饌。冰壺先生之齋。至若錢塘之茭苺。高山之紫芝。大宛之首蓂。二蜀之鷄枳。揀擇加精。調膈得宜。香聞爽臆。味適開眉。當舉案之頃。會稱觴之時。飲此佳品。喜溢厥頤。顧翳桑之徒餓。笑首陽之空饑。視彼蔓菁何物。蘿蔔奚為。客曰。子若徒知異之為美。而不知近之為奇。主人瞠焉語塞。拱手噤。曰。然則子所言美者。請備言而述之。客曰。有彼物兮。冰肌玉質。子不入於淤泥。根不資於扶植。金芽寸長。珠莖雙結。匪綠匪青。不丹不赤。宛訝白龍之鬚。彷彿春蠶之蟄。雖狂風疾雨。不減其芳。重露嚴霜。不凋其實。物美而價輕。衆知而易識。不勞乎椒桂之調。不資乎芻

黍之汁。數致而不窮。數食而不斂。雖以赫乎柱史之嚴。每嘗實之於齒牙。曷矣。憲臺之邃。亦嘗歛之而深入。當乎退食之委蛇。則伴其倉米之廩食。至於滌清腸。漱清臍。助清吟。益清職。視彼主人所陳者。奚相去倍蓰。而翅萬億也。與。主人聞而歎曰。得非市之所鬻。豈芽菜乎。客乃曰。然。主人曰。美則美矣。毋語近而遺遠。厭富而樂貧。客曰。子何見之晚也。夫天下之味適口者為佳。天下之士無欲者為貴。彼之所云者。非不口欲。我之所卻者。恐為心累。脫若致之弗克。則役之於心。役之於心。則為口體之累。傳不云乎。養其小者則失其大者。大者既失。雖羅五鼎。亦惟取羞。雖享太牢。適增其醜。語既。客即揖謝于于而退。

周叙修宋史

正統末。南京翰林侍講學士。吉水周功叙叙請刪修宋史。以畢先志。許之功叙曾大父以立。元鰲溪書院山長。上書修宋遼金三史。推宋正統後功叙修宋元。同上元陶元素未就卒。

莆陽物史

莆田周梁石瑛與黃太史仲昭同修興化府志。論議間有不合。自謂莆陽物史。

張元楨

張東白先生作文屬草每楮掌大作蠅頭細字或用故紙覆背書之

詩韻辨

華亭張東海先生^弱詩韻辨曰韻書始於江左。樊有因襲。雖有覺者。力莫解正。我朝始刊定洪武正韻。一洗千載之陋。誠萬世之幸也。惟詩家猶泥唐韻。曰凡古詩之流可用正韻。近體律詩惟用唐韻。問其所以。則曰律詩自唐始故也。苟依正韻。則曰落韻。特遵今之制耳。樂其實耳。試叩以唐韻。冬東青清之屬。何以異。虞模麻遮之屬。何以同。則曰自有五聲七音。輕清重濁於其間也。噫。是皆因襲而不察。淺陋而無見。口耳相承。臆度妄語。殊不知江左殊韻。正坐不知七音之當解。直據一方之所習。故失立韻之本原也。何輕清重濁之分耶。借曰唐詩用唐韻。則騷詞用楚韻。古選用漢韻耶。唐韻襲類譜而作。故梁韻也。何唐詩而用梁韻耶。唐韻至宋已加通併。非唐之舊則宋韻矣。又何唐詩而用宋韻耶。正韻惟取諧協。固寬矣。唐韻之聳牙者。亦得而捫。豈窄耶。且作者何計寬窄也。學士宋景濂所序。慎重精密之至。凡詩皆合用正韻。且不待辨矣。猶慮詩家習觀陰氏韻府羣玉。又以正韻定之。則凡詩之不宜用唐韻。又

可識矣。何淺陋者之因襲未復於正。又唱傳妄說。使高明者亦不得繇於正也。或曰李杜蘇黃諸家者。皆用唐韻。人不知病。蓋唐宋之世。病在韻。作者弗病也。况雖在唐宋。不依唐韻者亦多矣。泥者弗知。惟取諧協。則傳會其說曰漏底韻。出入韻。猶韻書上平下平。不知由編帙重大而分。乃曰音有上齟下齟之異也。上平始於東。終於山之意也。淺陋類此。不足一笑。泥者反以正韻為失。甯免笑乎。

李空同先生曰。張東海韻辨。東冬青清何以殊。虞模麻遮何以同。夫東冬青清反切本殊。而人自不殊。虞模麻遮調協本同。而人自不同。顧歸罪韻者。嗚呼。人之蔽至此哉。韻母子相生。五音互之。自然而成聲。智不能加。愚不能損。信如此言。則冬江真先虞尤不得通押。而說不得說。去聲哲不得哲。去聲耶。今人因前人云四聲出於沈氏。遂不復根究。便立訓教人。不知茲韻其來已遠。沈特校定之耳。

張東海自題像

隨處丹青寫我神。故人相見問何人。於今百草張東海。只有元來一個真。

司空圖

宋王禹偁辨五代史闕文云。圖字表聖。自言蒲州人。有俊才。咸通中。登進士第。雅好

為文躁於進取。頗自矜伐。端士鄙之。從事使府。洎登朝。游歷清顯。巢賊之亂。車駕播
遷。圖有先人舊業。在中條山。極林果之美。圖自禮部員外郎。避地焉。日以詩酒自娛。
屬天下板蕩。士人多往依之。互相推獎。由是聲名藉甚。昭宗反正。以戶部侍郎。召至京
師。圖既負才慢世。謂己當為宰輔。時人惡之。稍抑其銳。圖憤憤。謝病。復歸中條。與人
疏。不名官位。但稱知非子。又稱耐辱居士。其所居在鎮貽溪之上。結茅屋。命曰休休
亭。嘗自為記。云。如以上梁史舊文。按圖。河中虞鄉人。少有文采。為鄉里所稱。會王凝
自尚書郎。出為絳州刺史。圖以文謁之。大為凝知。入知制誥。遷中書舍人。知貢舉。擢
圖上第。頃之。凝出為宣州觀察使。辟圖為從事。既渡江。御史府奏圖監察。下詔追之。
圖感凝知己之恩。不忍輕離幕府。滿百日。不赴闕。為臺司所劾。遂以本官分司。辟之。
召拜禮部員外郎。俄知制誥。故集中有文曰。戀恩稽命。黜係洛師。於今十年。方參綸
閣。此豈躁於進取者耶。舊史不詳。一至於此。圖見唐政多僻。知天下必亂。即棄官歸
中條山。尋以中書舍人。召拜禮部戶部侍郎。皆不起。及昭宗播遷華州。圖以密邇乘
輿。即時奔問。復歸還山。故其詩曰。多病形容五十三。誰憐借笏趁朝參。此豈有意於
相位耶。河東節度使王重榮。請圖撰碑。得絹數千匹。圖置虞鄉市中。恣鄉人所取。一

日而盡。是時盜賊充斥，獨不入王官谷。河東士人依圖避難，獲免者甚衆。昭宗東遷，又以兵部侍郎召至洛，為柳燦傾阻。一謝而退。梁祖授禪，以禮部尚書召辭，以老病。卒年八十餘。又按梁室大臣，乃至有如敬翔、李振、杜曉、楊涉等，皆唐朝舊族，本以忠義立身，重侯累將，三百餘年。一旦委贄朱梁，其甚者贊成弑逆，圖以清直避世，終身不仕。梁祖故梁史拾圖小瑕，以泯大節者，良有以夫。柳燦為相，巨僚多被放逐，為監察御史，尤加畏慎。昭宗郊禮畢，上章懇乞致仕，曰：「察臣本意，非為官榮，可驗衰羸。」庶全名節。上特賜歸山。其詔畧曰：「既養高以傲世，類移山以釣名。心惟樂于漱流，仕非顯于貪祿。匪夷匪惠，特忘反正之朝。載首載思，當徇遊棲之志。宜放歸中條山，詔辭乃柳燦之文也。時多以四皓二疏譽之。惟僧虛中云：「道裝汀鶴識春醉，野人持言其操履，檢身非傲世者也。」又云：「有肯看御札，特地挂朝衣。其尊戴存誠，非要君也。」

楊守陳

楊文懿書惟立所作許先生哀頌詞後

銘志之言多溢美。予弟此作，蓋眩於銘志之言也。後有覽者，尚論其世，則茲人者，難乎免於君子之誅矣。言其可易哉。

李夢陽論文

昔人謂文至檀弓極。遷史序驪姬。云檀弓第曰公安驪姬。約而該。夫經史懸殊。經主約。史主該。譬之畫者。形容之也。貴得象。且如非驪姬。食不甘味。寢不安枕之類。是也。經者。史之要者也。曰安。而食寢備矣。自檀弓文極之論興。而天下好古之士。惑於是。惟約之務。為滄洗。為聳牙。為剗剔。使觀者知所事。而不知所以事。無由彷彿其形容。西京之後。作者無聞矣。

李空同先生刻陶淵明集。盡去評注。曰青黃者。木灾也。太羹之味。豈犀口所運哉。按古人注經。史子外集不多。及六臣注選。千家注杜。尚矣。其以批點行世者。蘇老泉之於孟子。劉辰翁之於李杜。為得其繁。萬歷中。晉江李贄所著藏書焚書等刻。導煽輕誣。末年吳興凌氏閔氏。專刻硃批。時雖紙貴。灾木何極。

舒芬與友人論文曰。六經未可以文法摹擬也。書禮序述。即事見道。風雅咏歌。以聲和律。曾何章法句法不類之顧耶。易始伏羲。不知六畫奇耦。其章法句法。果安在耶。春秋仲尼所筆削也。簡者一字。繁者僅三十五字。其章法句法。果安在耶。故今之論文者。動稱六經。則亦前人悞之耳。愚嘗以六經當以道論。不當文論。

李夢陽何景明

李何哀然四傑之首冠冕當代人無異喙間有微文未加點璧近常熟錢牧齋選明詩論李何最嚴不啻輪攻矣雖非定論錄竢公據

獻吉生休明之代負雄鷲之才憫然謂漢後無文唐後無詩以復古為己任信陽何仲默起而應之厥後齊吳代興江楚特起北地之壇坫不改近世耳食者至謂唐有李杜明有李何自大歷以迄成化上下千載無子焉嗚呼何其詩也夷考其實平心而論之由本朝之詩沂而上之格律差殊風調各別標舉興會抒寫性情源流則一而已矣獻吉以復古自命曰古詩必漢魏必三謝今體必初盛盛唐必杜舍是無學焉牽率模擬剽賊於句字之間如嬰兒之學語如童子之絡誦字則字句則句篇則篇毫不能吐其心之所有古之人固如是乎獻吉曰不讀唐以後書獻吉之詩又引据唐以前書紕繆挂漏不一而足又何說也國家當日中月滿盛極始衰粗才笨伯應運而起雄霸詞盟流傳謠種二百年以來正始淪亡榛蕪塞路先輩讀書種子從此斷絕豈細故哉後有能別裁偽體如少陵者必以斯言為然其以是獲罪於世之君子則非吾所惜也

仲默初與獻吉。初復古學。名成之後。互相詆譏。兩家堅壘。屹不相下。於是低頭下拜。王漢陂倒前徒之戈。俊逸粗浮。薛西原分北軍之袒。則一時之軒輊已明。身後之玄黃少息矣。予獨怪仲默之論曰。詩溺於陶。謝力振之。古詩之法亡於謝。文靡於隋。韓力振之。古文之法亡於韓。嗚呼。詩至於陶。謝。又至於韓。亦可以已矣。仲默不難以一言抹殺者何也。淵明之詩。鍾嶸以為古今隱逸之宗。梁昭明以為跌宕昭彰。抑揚爽朗。橫素波而旁流。干青雲而直上。評之曰。溺於義何居。世運遷流。風雅代變。西京不得不變為建安。太康不得不變為元嘉。康樂之興會標舉。寓目即書。內無乏思。外無遺物。正以暢漢魏之颺流。孫許之風尚。今必欲希風枚馬。方駕曹劉。割時代為鴻溝畫。宋元為鬼國。徒抱刻舟之愚。自違舍筏之論。昌黎佐佑六經。振起八代。文亡於韓。有何援据。吾不知仲默所謂文者何文。詩者何詩也。昔賢論仲默之刺韓。以為大言無當。矯誣輕毀。咸為膏肓。允為篤論矣。獻吉兩書駁何。矛盾互陷。獨於斯言。了無諍語。弘正以後。詭譎之學。流為種子。後生面目。個背不知向方。皆仲默謬論。為之質的也。

江河伏流

泰州儲平甫。洵。正德平未進士。歷福建按察僉事。輯草除錄。博採靖難諸臣。題曰江

河伏流平甫卒。門人私謚貞文子。

常倫逸詩

沁水常評事倫。題榭山大雲寺壁。宿此非一夕。游此非一朝。山夫頗解狂夫趣。時儲斗酒來相招。殿前長松十圍大。我欲絕粒栖雲巢。字大如斗。今存。評事集不載。

王璜雲中歌

濬縣御史王璜。正德辛巳進士。雲中歌八首。一曰。小王子口打圍時。自稱北狩產龍姿。殿上老軍莫相信。英皇元不納胡姬。

胡瓚

彰德胡瓚。嘗咏時苗還犢事。任中如有子。君欲付何人。洹詞

徐霖

武宗在臨清。召江甯徐霖。授教坊司官。不拜。乃授錦衣衛鎮撫。久益幸。至呼其字子仁。進必敝袍。遂賜斗牛襲衣。至南京。嘗夜過其家。從容懼燕。四更乃罷。

前李攀龍

濟南李攀龍。止白雲樓集。偶友人處鴻爪集。四帙云。濟南李攀龍于鱗著。亟讀之。則

常州□□人官太僕。□□在正德時。非歷下也。曾參殺人之誤。良不虛耶。

兩京賦

訓導□□彭大雅。柳州通判。常熟桑悅。御史。江甯余光。貢士。盛時泰。南京刑部郎中。臨川師機。並作兩京賦。光奏付史館。賜鈔千貫。安福李學士時勉。慈谿陳侍講敬宗。並作北京賦。教諭□□聶鉉作南京賦。

兩皇明通紀

嶺南梁億。東莞陳建。各著通紀。

張邦奇

張文定邦奇。作贈太監雲奇傳云。奇。洪武間。以內使守西華門。時丞相藍玉居第。去門不數十武。一日詭言其第井中。醴泉涌出。請上臨觀。而選壯士。衷甲。伏屏帷間。以俟。奇知之。將上變。云。按此。胡惟庸事。文定宿學。不宜悞。或梓人之訛。

修志

林煙。修福州府志。人物有邪佞。止宋人不及。國朝孝子割肝療親者二人。去之。烈女如科甲例。每行二人。其斥割肝者曰。使人割之耶。抑自割之耶。人割之。則世未有

肯無故操刀而殺人者。自割之其死矣。又安能內探五臟辨其所謂肝者而後割之耶。甚哉其妄也。又福清林榮初則仁歲貢。兵部尚書。本朝列卿年表未載。

平涼趙浚谷

時春

嘉靖庚申作平涼府通志。官師人物美惡備列。藝文僅記銘若干

首無詩。

王道書壁雜帖

順渠子曰。吾於古人有四恨焉。孔子曾見老子。而孟子不得見莊子。此一恨也。孟子得見子思子。而荀卿不及見孟子。又從而非之。此二恨也。揚子雲與鄭子真嚴君平同時同處。且知二人之賢。而不能相隨以隱。此三恨也。二程親見康節。而不能傳其先天之學。此四恨也。宇宙間有此四大欠事。而古今人皆未嘗說破。若以為當然者。然此又恨外之一端也。

王慎中

王遵巖先生作晉江楊角山墓志銘。戶部主事李纘父也。志述纘之言。吾楊姓也。世居安仁鄉之鈔舍村。以力農。本業自給。吾父早孤。而壻於陳城居也。遂居於陳之東隅。陳母故李毅齋公某之甥也。毅齋無子。故吾父育於李。而為之子。補李而妣陳也。

鄉人之敬愛吾父者。知為李角山翁。而不知為楊也。惟吾父始配陳某知之。而繼室張氏謝氏與吾兄續亦不能知。而續獨知之。今將題名於阡。作主於廟。惑於所稱之姓。先生其謂之乎。云云夫宗之必有別。異姓之不相為後也。在禮記之矣。李君雖欲徇翁之情。其如禮何。請志之。曰。楊角山處士之墓。先生作。向江潘翁墓志銘。銘作長論。又古法之變。

國朝人物編

江都葛澗子常。好積書。撰國朝人物編。自國初迄嘉靖。數百卷。人為列傳甚悉。年七十餘。友人私謚正學先生。

夏惟訥

崑山夏惟訥。好求遺書。嘗秘一篋。不以示人。沒後。啟視。壳管數十枝。手錄雜記百餘卷。

唐觀

江陰貢士唐觀。著延州筆記。李肇鶚於民家屏障上。斗麥易之。噫。文人遺業。類觀者何限。安得盡肇鶚其人。刊以問世耶。

李于鱗王元美手抄

陳眉公曰。李于鱗。王元美。在刑曹時。手抄史記文選一部。舉觥誦以記否。為賞罰。大泌山人批閱。以及南北史。皆有小識錄。他經傳稱是。

李于鱗閱史記

殷正甫

士儋

有李于鱗所閱史記於秦始皇本紀止。圈河魚大上人頭畜鳴八

字九

孝長
水集

王元美讀書後毀論

王元美所著讀書後四本。捐館後。公子吏部士騏於貨郎擔中。重價得之。今行世。又毀論十本。係先生手書。無副刻。常熟錢牧齋乞於吏部者。秘不示人。辛卯九月書室災。不存。惜哉。噫。文人子孫。如任昉。李白。許渾。諸君子。筆潤墨香。無論矣。有箕裘若吏部。而遺簡灰滅。他何望乎。

余翔

莆田余翔宗漢。嘉靖□□貢士。任全椒令。有治才。兩造盈庭。平決無停。嘗有羅氏寤宅。轉展數姓。至武氏。淘井得髑髏四具。加釘焉。呈於縣。公彷彿夢人以蘿擔屍過其

前時羅氏父死久。訊其子已七十。自供父本牙儉。正德間。四客投店。拔重貨。父端午日。醜殺之。釘腦骨。投井中。羅子論辟。其家竟絕。後解任歸。益肆力文章。而游興不減。盧敖家人生產不問。

穆文熙焚書

東明穆文熙。小春。憲副。購書十餘萬卷。疾篤。盡舉所積焚之。

謝陞季漢書

新安謝陞。少連。改陳壽三國志為季漢書。予蜀。正統。魏吳世家。按宋蕭常後漢書。鄭雄飛續後漢書。翁冉蜀漢書。元金華張樞陵川邾經。明長洲吳尚儉。並續後漢書。

春雪詩

鄞縣全天叙。萬歷。□□進士。試館之先。夢大父少司空。元立。戒以春雪詩。勿用六出。如其言。復選。

無名氏詩

僕夫不識路。躊躇路旁久。寒風吹衣襟。落日照馬首。吳中無名氏作。蘭溪吳孺子極愛之。謂深得古致。

明雋

濮州李尚寶先芳選國朝燕趙秦晉齊魯河洛淮揚藩獻之詩附以蜀曰明雋吳越荆楚不預焉東阿于文定序曰自二南以下十五國風皆江以北地也降而春秋吳越之歌吟乃出降而戰國荆楚之騷賦始傳故江以南之聲則歌吟騷賦之流而風之餘也非始音也原音之始以北先也按李尚寶初善王元美後元美從于麟游改嚮移好故明雋之外吳越荆楚有以也然所選多靡豔舒曼

宋登春

宋山人登春讀書嶧山厭薄交游乃作一小戶非匍匐不能入名曰狗洞縉紳先生過訪者輒難之惟濮上李伯承往來其中趙州強居仁集李伯承遲山人濮上館清平閣日啖狗脯飲白酒夜誦楞嚴經念伯承殷勤間與唱和援筆草就四座傾倒

北雍刊史

新建張洪陽位司業刊二十一史糜工部六萬金有奇

李相洲集

陳于陞修史

南充陳文憲相國時修正史

列聖本紀。皇后本紀。建文景泰以實錄附載。專紀有待。郊祀廟祀典禮樂律天文歷法宗藩學校選舉職官經籍賦役貨幣漕運河渠鹽法軍政兵制馬政刑法郡國九邊。凡二十二志。

揚徐滁陽三王傳。高祖之十七藩。成祖之二藩。仁宗英宗各四藩。憲宗之三藩。外戚。洪武之功臣諸臣。建文諸臣。永樂之功臣諸臣。洪宣諸臣。正統天順諸臣。景泰諸臣。成化諸臣。弘治諸臣。正德諸臣。嘉靖諸臣。隆慶諸臣。又理學文苑循吏高逸孝節亂逆權倖方伎四夷列傳。類二十六。志初畢。丁酉擬列傳。六月三殿災。輟業。又南充前卒。四明沈一貫。殊不以為意。非其始議也。

西泠社

萬曆丙戌八月。歙縣汪道昆。鄞縣屠長卿。朋輩集西湖之淨慈寺。仁和卓明卿。餘杭徐桂為地主。倡西泠社。

孫冕

孫冕字文中。江西德化人。歲貢。正德間任北通州訓導。善詩畫。嘗和李西涯春興詩。

八首。今錄其二。山館悠悠依峻坡。別來應是兩年過。鹿麋昔日游偏好。風雨他鄉夢更多。松下小軒閑雨菊。月中荒徑掩雲蘿。歸來若待頭顱白。其奈巖花笑客何。其一竹垣向裏闢新池。徑曲門迂去每遲。鳥弄落花人未到。魚吹新行月先知。天邊客夢何時醒。江上歸舟此日移。喚起巢由作賓主。不知身在昔堯時。

爭詩

夜月烏啼白門柳。隔江人唱後庭花。武康吳允兆。永嘉何无咎。各爭為己句。餘抗徐茂吳。桂曰。句未佳。何爭為。

喻應益

新建喻叔虞憲副楓谷先生均子也咏滕王閣萬壽宮各四首。

飛閣崇臺勝地留。層巒遠水檻中收。萋萋自綠王孫草。歲歲空生帝子洲。烟樹尚含羅綺怨。風濤不散莞絃愁。漂零莫縱登臨目。門掩斜陽獨倚樓。其一芳洲草樹碧纖纖。醉倚臨空意未厭。山翠過江雲入戶。春聲出谷鳥窺簷。花憐綺陌飄歌扇。柳近紅亭颭酒帘。千古繁華流水盡。獨留明月上珠簾。其二梅風杏雨柳烟開。滿眼芳菲祇自哀。客子臨高曾作賦。游人攬思獨登臺。於今殿閣盤空起。依舊雲山隔岸來。不識王郎

風送別誰言伯璵更憐亦其關市烟塵黯未通蕭條旅泊散江風龍河蜿蜒滄波上
雉堞參差晚照中昌邑舊城葭葦渡南唐廢址水煙空芳時士女應多恨遮莫還歌

大小東

其四 王閣 滕

百疊青山磴道盤丹臺深鎖赤欄干塔前柏是當年樹雲裏家猶舊日壇漢祀祇今
歸太祝宋皇曾此拜祠官無勞更表洲沙讖潮落空江鐵樹寒其九柏威蕤偃翠苞
亭亭十里辨烟梢雲深珠樹樓歸窠月滿霜潭泣老蛟風殿香浮爐影細星冠衣集珮
聲交野人掃地齋心拜芳渚青蘋藉白茅其玄功自昔滿鄉邦飛劍雲中氣尚雙三
洞絳霞飄羽蓋五溪瑤草映芝幢金丹鷄犬歸仙島鐵鎖魚龍臥楚江里社年年誇
禱饗九天時擁百靈降其白袷青鞵稱短衫採芝幽澗荷長鏡乍瞻丹壑窺金穴細
讀玄文叩石函天谿神臯開廣漠樹盤仙嶠出巉巖雲房玉磬松關月未到蓬山已

隔凡

其四 壽宮 萬

王穉登

萬曆癸丑元旦吳縣王百谷卧疾吟迎春詩一首即述

馮元成論文

馮文所先生曰。古之文簡。今之文繁。古之碑碣志銘。苟無關係。則不書。如緩急親黨。不過曰。待以舉火數十字。一二語耳。今則連篇累牘。曰某也婚。某也葬。數其事而記之。瑣瑣屑屑。如甲乙簿。何當哉。噫。予居常所為。緩急人者。一月或至數十事。使他日子孫欲為予紀載。則且至數十冊薄。豈理也哉。唐以來。韓昌黎最為大家。其志銘等文具在。寥寥僅一二百言耳。然其時且以諛墓譏之。至於今。或一序數千言。或一傳數萬言。荊州先生所謂山河大地不能作架子。誠有味乎其感歎也。是故君子之文。甯損無益。甯慎無濫。甯拂人之子孫無違人之月旦。

周玄暉

崑山周復俊子。嶺南。南京太僕寺卿。嘗館於木人涇之旁。著涇林雜記。涇林類記。孫玄暉。萬歷丙戌進士。嘗任御史。左遷。補電白令。放歸。著涇林續記。始舉筆。赤蛇墮研。刊成。怨家張氏增飾宮掖一二事。孽於縣令陳祖苞。撫按奏上。致宸怒。逮下刑部獄。卒。人多冤之。

陳植之

武陵布衣陳植之。□□雖業醫。苦吟好學。歛縣吳允德符。摘其佳句。如疎鐘四壁靜。

微雨一燈明。移花春徑雨。看竹午窗風。繞舍田疇熟。遙村砧杵連。王門芋自好。客舍
缺空彈。河朔追狂飲。滄浪起浩歌。因贈之詩曰。昔賣名山藥。女子識伯休。孝先尋教授。
大有童蒙求。單瓢在陋巷。朝夕僅能謀。上有白頭母。啜菽代庶饘。下有黃頭兒。擁絮
視輕裘。孑身同鰥魚。牧犢好為仇。苟非真有道。疇能堪此愁。自我不相見。十年幾再
周。時時卒菑蒿。隱若對前修。重逢愆愈甚。每語無怨尤。依然曳決屣。強歌仍自酬。感
贈不遇賦。沈思真一抽。申之貧士咏。庶跡古人游。異時高士傳。真隱定見收。

中秘書

晉江謝肇浙。在杭為水部日。福清葉相公直閣。求閱秘府書。潛隨入翻閱。僅抄劉後
村集三十冊。

收書法

南充陳元忠相國。于陞。好儲書。平湖沈幻真太史。懋孝。勸其據類書注中所引証之
書。覺篇目不經見者。日月標記。令書賈。時時博求之。無意中忽得奇書。又據天下書
目。考其版籍在諸路者。時時馳尺一。託交游間。如目搜羅。期得乃已。自戊辰至甲戌
七年。元忠以此法得奇書三千部。及家艱。寄書京師。勳戚家半失去。

纂書

開國事畧本湖廣行都司經歷蔡于壁之龍飛紀畧卓氏藻林本吳興王氏所輯嘉隆以來諸公掠美者頗多噫。仰眠床上看屋梁著書千秋萬歲誰傳此者幸傳矣。又為宋齊丘所據惜哉。凡纂書有三。貨得之可也。陰得者次之。最下則躑跖。

死書

藏書佳事也。闔省不數家。家不數傳。如浦江義門鄭氏八萬卷燬於火。義烏虞侍郎守愚參政德輝父子樓藏萬卷。署曰樓不延客。書不惜人。後蘭谿胡孝廉應麟賤直得之。今亦佚盡。太倉王元美書最富。再傳而失。開封中尉睦樺之萬卷堂。會稽鈕氏之萬卷樓。吾甯祝侍郎以幽之萬古樓。武康賂侍御駸曾。平湖馮孝廉茂遠。常熟錢宗伯謙益諸家。非流散則如焰矣。噫。縹帙緗函。何預天曹事。往往被厄。不能久。獨設靈威丈人之秘牒。玄夷使者之珍符。貯卿嫫而儲二酉。概如此。厄天上司書吏。地下修文郎。亦寂寂難堪矣。楊循吉既老。散書親故。今蕩子爨婢。無復着手。是或一道也。錢宗伯好儲書。尤喜較訂。廣蒐博引。一編中粉墨丹黃層見。錯書有所疑悞。千里之外。托人研考。其購藏甲於東南。亂後撰明史。凡二百五十卷。辛卯九月晦甫就。越

後日見燼。大始作。見朱衣者無數。是非不得其平。遂以焚惑掃之。隻字不留。亦一異也。

文警

正德中。鄆縣王簡討九思敬夫。失官。老而喪明。四方求文。口占授之。人疾書不給。萬歷末。秀水陳學士懿典。血嘗。晚喪明。詩文酬應如故。出謁公府。侍兒牽其裾。即揖讓進退。動作如禮。

唐府輔國將軍宇決。五歲喪明。從師書掌識文字。日耳記千言。著名獻錄。辨疑碑。各一卷。

華亭唐汝詢仲言。五歲目盲。父兄抱膝上。授詩書。好聽受。博通經籍。注唐詩解五十卷。援据該博。著編蓬姑蔑等集。齏使楊鶴旌其廬曰耳學。淹通。捐俸刊其書。常過常熟。錢謙益所。酒間誦子虛上林諸賦。杜白諸長篇。不遺一字。留校杜詩。時有新義。如解溝壑疎放之句。云出於向秀賦。稽志遠而疎。呂志放而曠。亦前人所未及也。

鍾惺譚元春

鍾惺詩行於世。孟津王鐸宗伯曰。如此等詩。決不富不貴不壽不子。

洪範明義

漳浦黃石齋道周著孝經集傳。又奉命纂洪範明義四卷。戊寅被謫。即進呈云。臣攷篇中有錯簡者三。訛字者三。錯簡如五紀三德數言而在後。威福建極數言。錯而在前。訛字如晨為農。戈為忒。殛為極之類。皆伏晁之所不稽。鄭孔之所未說。宋元諸儒稍發其端。明興諸儒未竟厥緒云云。

蔣德璟日記

晉江蔣八公相國。性嗜書。留心經濟。有部郎使榆關。語之曰。彼處馬豈頗多。宜注意。部郎初不以為然。至則果如其言。所著日記。

爭妾詩

崇禎癸未。楚撫宋一鶴敗沒。妾金陵陳氏。以色藝為門客王屋所聘。貴陽謝參政上選。先娶致訟。新安貢士程奎詩。歌舞叢中度歲華。一朝忽散抱琵琶。前身定是烏衣燕。不在王家即謝家。

山城曲

十七八正少。二次明少年。年少如春草。草榮一霎然。口莧莧武藏州。四圍無山島。月

出惟青草月沒還青草。山城者日本也。好事有譯其曲者。見鄭以偉猶奕稿。

永和宮詞

吳梅村作

揚州明月杜陵花。夾道香塵迎麗華。舊宅江都飛燕井。新侯關內武安家。雅步纖腰初召入。鈿合金釵定情日。豐容盛鬋固無雙。蹴鞠彈碁復第一。上林花鳥寫生綃。禁本鍾王點素毫。楊柳風微春試馬。梧桐露冷暮吹簫。君王宵旰無懽思。宮門夜半傳封事。玉几金牀少宴眠。陳娥衛艷誰頻侍。貴妃明慧獨承恩。宜笑宜愁慰至尊。皓齒不呈微索問。娥眉欲蹙又溫存。本朝家法修清讌。房帷久絕珍奇荐。勅使惟追陽羨余。內人數減昭陽膳。維揚服製擅江南。小閣爐烟沉水合。私買瓊花新樣錦。自修水遞進黃柑。中宮謂得君王意。銀鑲不如溫成貴。早日艱難護大家。比來懽笑同良娣。奉使龍樓賈佩蘭。往還偶失兩宮懽。雖云樊嫔能辭令。欲得昭儀喜怒難。綠綈小字書成印。瓊函自署充華進。請罪長教聖主憐。含詞欲得君王愠。君王內顧惜傾城。故劍還存敵體恩。手詔玉人蒙詰問。自來階下拭啼痕。外家官拜金吾尉。平生游俠多輕利。縛客因催博進錢。當筵便殺彈箏妓。班姬才調左姬賢。霍氏驕奢竇氏專。涕泣微聞椒殿詔。笑談豪奪滿陵田。有司奏削將軍俸。貴人冷落宮車夢。永巷傳聞去

玩花景和門裏誰陪從。天顏不憚侍人愁。后促黃門召共游。初勸官家佯不應。玉車
早到殿西頭。兩王最小牽衣戲。長者讀書少者弟。聞道君王譽定陶。獨將多病憐如
意。豈有神君語帳中。漫云王母降離宮。巫陽莫救蒼舒恨。金鎖凋殘玉筋紅。從此君
王慘不樂。叢臺置酒風蕭索。已報河南失數州。况驚少子傷離落。貴妃瘦損坐匡床。
慵髻啼眉掩洞房。豈憚湯温冰簟冷。荔枝漿熟玉魚涼。病不禁秋淚沾臆。徘徊自絕
君王膝。苔沒長門有夢歸。花飛寒食應相憶。玉匣珠襦啟便房。雍歌無異蔡同昌。君
王欲製哀蟬賦。誅筆詞臣有謝莊。頭白宮娥暗頓颺。庸知朝露非為福。宮草明年戰
血腥。當時莫向西陵哭。窮泉相見痛蒼黃。還向官家問主王。幸免玉環逢喪亂。不須
銅雀怨興亡。自古豪華如轉轂。武安若在憂家族。愛子雖添北者愁。外家已葬驪山
足。夜雨椒房陰火青。杜鵑啼血濯龍門。漢家伏后知同恨。止少當年董貴人。碧殿淒
涼新木拱。行人尚識昭儀塚。麥飯冬青問茂陵。斜陽蔓草埋殘壘。昭丘松檟北風哀。
南內春深擁夜來。莫奏霓裳天寶曲。景陽宮井落秋槐。

思陵長公主挽詩

貴主徽音美。前朝簡命光。鴻名垂遠近。哀誄著興亡。託體皇枝貴。承休聖善祥。母

儀惟謹肅。家法在矜莊。上苑穠桃李。瑤池小鳳凰。鸞章青綉屐。魚笏紫縹囊。沉燎薰
爐細。流蘇寶蓋香。禊期陪菽水。繭館助條桑。綠緜丸蘭佩。紅螭薤葉璋。錫封需大國。
喚仗及迴廊。受冊威儀定。傳烽羽檄忙。司輿停鹵簿。掌瑞徹珩璜。發宿明河澹。微垣
太白芒。至尊憂咄吒。仁壽涕滂徨。酈邑年方幼。瓊華齒正芳。艱難愁付託。顛沛懼參
商。文葆憐還戲。勝衣泣未遑。從容咨傳母。倥急殉貂璫。傳箭聞嚴鼓。投籤見拊床。內
中縫賜甲。中旨票支糧。使者填平朔。將軍帶護羌。甯無一矢救。足慰兩宮望。盜賊狐
篝火。關山蟻潰防。逍遙師逗撓。奔突寇披猖。牙轟吹看折。梯衝舞莫當。妖氛纏象闕。
殺氣滿陳倉。天道真蒙昧。君心顧慷慨。割慈全國體。處變重宗潢。胄子除華紱。家丞
具巫裝。勅須離禁閤。手為換衣裳。社稷仇宜報。君親過勿忘。遇人尚退讓。慎己舊行
藏。國母磨笄刺。宮娥掩袂傷。他年標信史。同日見高皇。元主甘從殉。君王入未
央。抽刀凌左闔。申脰就干將。噓血彤闈地。橫尸紫纛汪。絕吭甦又咽。瞑睫倦微揚。裹
袴移私第。霑胸進勺漿。誓肌封斷骨。如戚吮殘創。死早隨諸妹。生猶望二王。股肱羞
魏相。肺腑恨周昌。賊遁仍函谷。兵來豈建康。六軍勞面慟。四海遏音喪。故國新原廟。
羣臣舊奉常。贈圭陳厭翟。題奏載輜輶。隧偏賢妃塚。山疑望子岡。銜哀生父老。主祭

失元良。訣絕均坏土。瓢零各異方。衣冠羸博奕。風雨鵲鴿行。浩劫歸空壞。浮生寄奇渺。
茫。玉真圖下髮。甲伯勸承筐。沉水餘堯女。管丘止孟姜。君臣今世代。甥舅即蒸嘗。湯沐
鄉亭秩。冢門殿省郎。淒涼脂粉硝。零落綺羅箱。宅枕平津巷。街通少府墻。書閣借妯
娒。曉坐向姑嫜。偶語追銅雀。無聊問柏梁。豫游推插柳。勝跡是梳妝。菑菑鴛鴦扇。茱
萸鸚鵡觴。大庖尚膳廠。奇卉北花房。煖閣葫蘆錦。溫泉豈菟湯。雕新獅首戾。甜食虎
睛糖。壯麗成焦土。榛蕪拱白楊。麋游鳩鵲觀。苔沒鬪鷄坊。荀灌心惆悵。秦休志激昂。
崩城身竟隕。填海願難償。命也知奚憾。天乎數不臧。累獻床箒語。即寔寢園傍。半體
先從父。遺骸始見娘。黃泉母子痛。白骨弟兄殤。夙昔銅駝泣。諸陵石馬荒。三年修行
藻。一飯奠嵩邱。寒食重來路。新阡宿草長。溪田延黍稼。隴笛卧牛羊。朽壤穿螻蟻。驚
沙起鴝鶒。病槁眠廢社。衰草折寒塘。列剎皇姑寺。馱經內道場。侍鬢稱練口。小像刻
沉香。玉座懸珠帳。金支渡法航。少兒添畫燭。保媪伴帷堂。露濕丹楓冷。星稀青鳥翔。
幡旌晨隱隱。鈴鉦夜鏘鏘。控鶴攀龍馭。駉麟謁帝閭。靈妃歌縹緲。神女天徜徉。苦霧
迷槐市。雌霓繕建章。歸鄩思五廟。涉漠淚三相。柔福何慙宋。平陽可佐唐。虞淵瞻返
日。蒿里叫飛霜。自古遭兵擾。偏嗟擁樹傍。魯元馳孔亟。羊季負倉黃。漂泊悲臨海。包

舍恥漂陽。本朝端闡闕。設制勝岩疆。處順敦恭儉。時危植紀綱。英聲超北海。雅操過東鄉。新野墳松直。招祇祠柏蒼。薤歌雖慘澹。汗簡自輝煌。諡號千秋定。銘旌百襮彰。秦蕭吹斷續。楚挽哭滄浪。

盧歧疑

長泰盧歧疑。嘉靖甲辰進士。終貴州按察使。初為戶部郎。與汪道昆同舍。有遺脂香油於汪者。汪問在古何云。歧疑曰。唐人謝賜口脂豆澤。此二物也。宴席有糖獅象。復問於古何云。曰。漢光武禁祝糖。不許高大。此是也。

王九思謝榛袁宗道

鄆縣王九思。漢陂集自序曰。余始為翰林時。詩學靡麗。文體萎弱。其後德涵獻吉。導予習其易焉。獻吉改正予詩者。稿今尚在也。而文由德涵改正者。尤易。然不獨余也。惟仲默諸君子。亦二先生有以發之。願予頑鈍。不能勉副其意。故今老且朽矣。而於所習詩若文者。竟亦無所得焉。是則可恨也。

謝榛詩家直說曰。作詩勿自滿。若識者詆訶。則易之。雖盛唐名家。亦有罅隙。所謂瑜不掩瑕是也。已成家數。有疵易露。家數未成。有疵難評。

袁宗道曰。時有古今。詩言亦有古今。今人所說為奇字與句。安知非古之街談巷語耶。方言謂楚人稱好曰黨。稱慧曰誦。稱跳曰跼。稱取曰槪。予生長楚國。未聞此言。今語異古。此亦一証。故史記五帝三王紀。改古語從今字者甚多。疇改為誰。俾為使。格姦為至姦。厥田厥賦為其田其賦。不可勝紀。左氏去古不遠。然傳中字句。未嘗習書也。司馬去左亦不遠。然史記句字。亦未嘗肖左也。今日逆數前漢。不知幾十年遠矣。自司馬不能同于左氏。而今日乃欲兼同司馬。不亦謬乎。空同諸文。尚多己意。紀事述情。往往逼其真。尤可取者。地名官銜。俱因時制。今却嫌時制不文。取秦漢名銜以文之。觀者若不檢一統志。幾不識為何鄉貫矣。且文之佳惡。不在地名官銜也。

失婢詩

馮李陳詩教和唐人失婢詩。集句。楚客停梳欲問誰。

顧况

流鶯上下燕參差。

李商春

閨不閉。歲徒鎖。

韓翃

長路多逢輕薄兒。

取諱

應為能歌繫仙席。

鄭谷

只緣幽恨在新

詩。非

今朝繞郭花容徧。

李涉

別有傳心事。豈知

白居易

廣孝錄

邑人周珽。青羊。善畫葡萄。晚輯廣孝錄若干卷。弘光乙酉夏。疾篤。夢人語以待廣孝

錄成遠錄亂時失其二卷後年卒。

續哀江南賦

嘉興沈世注續哀江南賦

粵以甲申之三月盜弄乾樞神器無主帝既醉於鈞天人或腥於毳幕中興道銷窮於三檀厄運之極古今未有歌臺走麋鹿之踪過市盡髡鉗之客晨看旅鴈辭玉塞而凝雲夜等銅仙望秋城而泣雨昔士衡入洛之日仲宣登樓之年並在亂離咸有著述謝眺釣者之賦思江海之無波潘岳關中之詩憫荆榛之載道雖復顰輸浣女步媿瑟人盛衰之感同斯來軫誰非秦地空想桃花詎有商岩遙尋芝草冰魚未絕徒懷挾雨之心螿燕猶蘇不謝雕梁之憶鐵鎖既沉木葉再落興言往吊追賦斯篇日月如馳人間何世夷門日冷魏市成墟易水風悲秦筑罷擊惟雪衣之委羽曾侍先皇若供奉之捐生堪羞朝士兼年累月悵切南冠飲恨吞聲私修漢臘尊羹秋滿柳箭春搖恐菊水延歲之方桑滄非可俟之晷夫霸孫啟祚尚揚赤壁之靈弱宋遺都猶報朱仙之捷亦各控帶數州網紀百載豈有蘆牌扶掖竟浦浮江代馬胡韉凌波渝水烏孫千騎控淮水而鳴弦翟泉雙鶴指吳都而扇翼五陵冠鳥邈矣華風萬里

縵纓此焉戎俗二三俊。又徒懷死衛乘輿之心。百萬義師。竟少固我藩籬之具。豈昔之龍盤虎踞者。佳氣盡於此耶。是知崖山執節。終靡信國之旗。大海揚波。必覆張侯之艇。天意人事。不禁臨風喟愴者已。世涵山雌辨色。將遠謝乎樊籠。爰居避風。曾何情乎鐘鼓。豈希黃絹之題。聊比縈緯之恤。文博之枕流漱石。竊有志焉。子山之垂露涌泉。瞠乎後也。賦曰。臨江皋以四望兮。氣紆結而懷憂。伊天步之艱難兮。神怳怳而凝愁。昔高后之作京兮。實祚土於鍾丘。控方塘之白水兮。枕震澤之清流。封狼胥以為鎮兮。琛沒羽而為州。湛盧宵飛而吳定兮。樓船朝濟而漢謳。數軍實於長洲之苑。饗我旅於武昌之樓。黃旗雨轉。紫蓋雲浮。剪桐珪以錫燕。更奕葉而遷幽。於樂都之麗康兮。乃陪服於南留。華實徧野。紅粟方舟。引陂泉而滋灌。注兮。指翼軫而帶女牛。歷三百而無事兮。不識夫鮫函之與屬鏤。雖有祿被之媒。孽萑蒲之嘯聚。不旋踵而夷囚。於是士女游冶。族姓繁富。玉樹挺於王謝。朱輪侔於陸顧。老成奕世。典型似續。銘勒燕然。旌懸月窟。烽火息於漁陽兮。貢葡萄與天馬。時旣泰而將屯。人娛安而忘苦。家築夏后之臺。戶涉周王之圃。鳥轉歌來。花穠雪舞。風流清談而炫名。卿尹賞鈞而造禍。武帳絕韜於龍豹。文絃罷奏於鄒魯。腥鮑爛而是求兮。白馬沉而何補。既而

燕厦將焚。魚鼎日沸。閭左有揭竿之呼。嚴關無折柳之敵。天子方履端門而御平臺。召百官而延多士。期弱草之凌勁。風假乖螭以行淫雨。請纓則終軍。彈劍則馬武。出玉關而論兵。宴蘭池而旁午。空杼軸於二東兮。猶呼庚而未止。爾乃宮鳴野雉。星落天狐。夏箭不能殪仙芝之靈。秦鐵不能禁驪山之徒。彼小醜之馮陵。固蔓延而滋多。逞其鴟梟之性。鼓其鯨鯢之濤。野烟炊斷。白骨丘枯。一二秉鈞。握樞之佐。方留賊以自固。曾莫肯兮。焦慮而殷圖。墨吏熬其骨。殘兵密於籠。虺毒吹熾。豺牙橫厲。黃巾大呼。銅馬如蟻。戟已及於觀門。羣工猶侯第而夜嬉。橋山之弓不歸。茂陵之盜日出。草木為之飲血。神人於焉雪涕。江表藉司馬之靈。奉神皇之胤。值天地之睢刺。晝江淮而宅鼎。四海喁喁。臻響屬影。咏南音之顧懷兮。願覩中興而昭淑景。帝不悔亡。漢荒是逞。金鞭未收於傳舍。鐵杖已投於晏寢。方採佳麗以實椒宮。構迎風以連結綺。元宰無東山之望。牧伯非睢陽之擬。第首鼠而蠅營矣。恣苞苴而成水火。地圻天崩。鼓卧旗仆。鬼同謀於曹社。帝醉錫以秦士。翳上將之披猖。各飛揚而跋扈。既王器之沉淪。乃不恥乎降北。虜單于置酒而長圍。截橫江而竟渡。立馬於吳山之巔。射麋於蘇臺之許。羨靖國之捐軀。獨名存而禍酷。爰有河橋魏將之符。關路田文之客。拭玉

張旃尋盟許國。恩坐觀於時變。亮國仇而莫塞。青龍之艦未浮。飛燕之舟。口口喟魚甲之潛去。聞鶴唳而不得。關冑空懸。折鈎寡色。日冉冉而虛逝。兮田寧掌而弗釋。紉冤心以為纒兮。編愁苦以為臆。奚我逢此厄辰兮。刻著志之靡適。掩柴翟之荒扉兮。浮雲惜而送日。服縵纓而椎結兮。別有虬龍之與螾蝮。於是胡風曉白。清笳夜驚。控弦洞庭之浦。校陣彭蠡之陰。餘腥烟散。□□□□。戈既揮於漢皋。守無聞於壽春。精衛啣石而遇矢。文鯨夜飛而觸兵。曩時冠帶衣履之俗。莫不輸金縢於宮帳。謝督芻於龍庭。遙瞻巫岫。極目海陵。荒臺月寂。古榭風平。馳鳴春草。駱汗芳葵。書盡灰於秦劫。劍已化於豐城。若乃金柯霞震。瑤葉雲靡。別艷姬於楚幄。墜寶玦於城隅。悲有雍門之瑟。客無報韓之錐。玉笛碎而人往。雉裘委而身糜。溘朝露以同盡。積為怨而難舒。至如李陵窮幕。王衍排墻。弔影奪魄。名隕心愴。慙塵尾之刻玉。羞鴈足之裂纒。求靈兮故望。咏落月兮北梁。華椽云覆。金穴何嘗。顧白日以無色。入修夜之不揚。若夫二京學士。五都游子。脫畧公卿。跌宕文史。驅征馬而不前。傷搖風之四起。似輕絮之颺。絲類弱鱗之失水。鬱青霞之奇志。獨快抑而誰語。况復君涉江波。妾溯交湖。望子琴而不返兮。放子去而煩多。哀拍留聲於文姬。新箏寫恨於羅敷。紫臺夢香。江南草枯。

感別離之萬狀。淒雨散而烟哀。更有孤臣危涕。烈士墜志。屍懸馬草。血洒乘塵。霜張其志。日貫其精。厲勁節於歲寒。守如石之筠貞。慕嵇卞之遐躅。渺翩翩而結纓。彼闔門之殉死。實鐵中之錚錚。原金陵之始禍。蓋蕭牆之內起。上游懼楚甲之乘天塹。遂胡馬之濟十五國之亡忽焉。十六王之宗不祀。漢老想司隸之儀。南人望壽皇之址。痛麥秀於殷墟。泣山河之異志。朔弓如月兮。心胆寒。朔刀凝雪兮。骨肉凜。□□□□□□。殤魂游於鳳凰之臺。鬼火亂於瀟湘之渚。蒼雲則七量合圍。海潮則三日不至。歎東舟之已膠。何南風之不兢。雖復荆有七澤。揚沮三江。曾無肥水之捷。屢效石頭之降。河方堅而騎斷。楫未擊而鷄荒。冤霜暑落。憤水秋長。天之所廢。其何以昌。昔天下之一家。倚東南之藩蔽。自付託之庸邪。舉江淮而全棄。信辭鄉而哀賦兮。機入洛而榮著。聊儻回以娛憂兮。觀江南之變態。

補豔骨行

及京

至元初。江浙平章阿魯只班。子婦以亂死。歸骨於其鄉西湖。北山僧黃龍老人。作豔骨行。事載邵衣聞臨安雜志中。今其辭亡矣。嘉善及京補之。留山中以貽好事者。彩珠天下墜。華月掌上珍。萬里陰山雪。一枝瓊樹春。陰山直北飛蓬逐。海上迤東晴。

沙蹴烏孫公主戀玉門。漢家明妃厭金屋。麗人獨立穹廬地。深閨長養旃裘族。名花
實幄白晝寒。異香錦幕清夜燠。長白山頭瑤草暉。鴨綠江口蜻蜒飛。閨氏妬得泣不
得。秦皇求仙祠未歸。朝辭名王聘。莫卻翁侯婚。膏髮明璫潤。慵珠暗袖溫。門庭設關
記。壁戶塗椒葢。屏口映于飛。窓選中連理。簫弄未離秦。鵲填初度水。一雙翠羽鳴。二
五金波始。翠羽金波夜復朝。銀笙錦瑟曉連宵。吳宮闕草吹香佩。魏苑彈碁拂書綃。
千金舞買青衣笑。百琲歌徵小史妖。嬌歌豔舞惟不足。握槊藏鈎戲相促。填門車馬
多貴臣。綠鞵丹謁座上賓。記與客語試公子。罷就婦飲真人。盈盈天街北。皎皎粵
女津。一朝甌脫秋風起。十萬控弦紫雷指。將軍開府浙江頭。夫婿承恩官舍裏。携家
迢迢入蕭關。金僕如抽壁玉弓。鳳子冠搖碧條脫。龍媒驪煖青連環。南國徵書轉。西
園宴賞開。園中桃李鬪春妍。湖上清明放鷓鴣。寶馬香過烟岫寺。錦帆花出畫橋船。
歸來明月蓮花炬。醉照華堂燕子箋。夢中小小不知愁。畫裏真真自起樓。紅苴新聲
翻鬢栗。青琴素手劈篁篔。辟塵龍女拂。照骨威姬彊。橫波賭射嬌。分鏡感翠爭。曉泥
占散長。夏成陰綠樹好。瑤階手種宜男草。侍兒私語記紅潮。八月停煎賀房老。玉杯
金盞索郎持。綉閣珠屏不自支。水晶菡萏葡萄夜。玳瑁梧桐橘柚時。嗔啼頰怒重無聊。

鳳口熊走空相嬌。自茲卧起如翻水。遂令服食同迴廳。初就增城館。未整政君翹。冰
桃雪汁琉璃餠。火棗霞漿琥珀盃。西池王母覈仙書。南岳夫人降鳳車。鳳車何歲甃。
雲璣正杳冥。瀛海風冷冷。聚窟香炯炯。溫明秘器賜東園。南方楮甲寵魚軒。雪肪紫
錦桃花洞。玉匣珠襦青鳥幡。青鳥青珠照青閣。桃花桃浪吊桃筓。鴻都道士訪太真。
上林神君見宛若。南枝越鳥啼北風。代馬嘶紅顏。一旦化旅魂。國俗由來重歸國。六
丁朝煉形。三官夜考魄。玉棺啟視儼明粧。丹唇含笑露幽芳。芝焚蕙剪爨蘭薪。鶴馭
螭飛駕鳳輶。鎖子九霄烟。磨尼五色露。金膏百和拾空青。錦疊千雙陳寶璐。大招遙
返塞北山。選日發引江南路。傾城鞅韜盡蟬貂。導馬貌貅盡鳳簫。碧雲車洒神靈雨。
素奈花替士女髻。經梁復經梁。渡滌復渡遶。遶山空水歷平原。蜀帳毳廬扶馬驕。已
矣哉魂歸來。雪磧晨寄穴。冰天夕築臺。風姨掩袂慟。月姐濕纓衣。服匿承肌酪。留犂
薦乳酪。珠琲酬送使。繒綵賚輿臺。黃金千百鎰。都護跨驄回。